

東  
華  
續  
錄

東華續錄

光緒一百二十七

臣朱壽朋敬編

臣潘鴻鼎恭校

五月辛未朔唐景崧電致總理各國事務衙門開口歸還旅案加費一萬萬臺灣係未失地大可援此案加費贖回原議兵費償二萬萬又贖還贖臺之費請各國公評價值即可指臺灣押與他國抵借鉅款所有賠款均由此出似此辦法則遼旅臺灣均退還中國而賠款數萬萬均由臺出據江督電稱美國曾估臺灣可押十萬萬即不如數大約數萬萬可押請 旨飭下總署與李鴻章向日本速議臺民誓不服日日難收取李經方來臺交割臺民憤極定甲奇禍即澎亦斷不可往實相愛非相忌之辭改派他員來臺恐亦無善全之策伏思償款二萬萬又加贖還旅費部臣如何措手借用洋債各省海關全為英國所踞已屬難堪借必應還我又何以立國不如贖臺而轉押臺則費有所出至將來贖臺之費從容計謀自有衆舉易舉之法容再續陳惟押臺之說毫無外洋巨商請飭江督與議總之 朝廷不忍割地棄民人心咸奮百事可爲一失人心斷難再旺臺民間李經方偕日會即日收臺變在旦夕儻蒙俯采衆議乞速諭知請代奏得 旨著交李鴻章閱看李鴻章電覆總理各國事務衙門以唐景崧不明洋情橫生異議

寢其事○壬申臺灣民人公議自立爲民主國擁署臺灣巡撫唐景崧爲總統布告各國○諭已革提督  
蔣桂林前因屢次過敵潰退降旨拿交刑部治罪茲據刑部奏稱該革員現解送到部請旨辦理等語蔣  
桂林應得罪名卽著刑部嚴行審訊按律定擬具奏○諭前因御史鍾德祥奏參山東掖縣補用都司李  
承卿勾引匪徒王作仁等強奪地畝淫掠婦女各款當諭令李秉衡飭屬將首從各犯嚴拿訊辦茲據奏  
稱李承卿與王作仁等均無潛結匪徒聚眾橫行之事惟於吳連英與王作仁控爭鍋廠一案輒敢干預  
詞訟潘俊外出未歸逼令其子女立時出屋實屬恃尊爲花翎游擊銜補用都司李承卿著卽行革職  
交地方官嚴加管束○癸酉諭軍機大臣等定安奏病勢增劇請開去營留差使回旗調理一摺著照所  
請准其開去差使惟東三省馬步練軍現在多半駐紮省尙未撤防應如何分別撤留之處著定安會  
商裕祿長順依克唐阿奏明辦理其撤回之兵卽責成盛京吉林黑龍江將軍破除積習認真訓練俾成  
勁旅所有練軍餉項卽由三省將軍各歸本省撥分成數妥爲辦理定安著俟將兵事餉項統行交代清  
楚再行回旗將此由四百里各諭令知之○諭前因御史鄭思賢奏江蘇徐州府屬與河南歸德府接壤  
盜匪聚聚搶掠歸德鎮總兵楊玉書署徐州鎮總兵程孔德剿捕不甚得力請飭查辦等語當諭令張之  
洞劉樹堂嚴飭地方文武各員迅速捕拿毋任滋蔓茲據張之洞奏稱幅匪夥大王三在山東河南江蘇

交界地方糾黨爲非經總兵程孔德徐州道沈守謙等派兵剿捕當將大王三擊斃並擒斬餘黨數十名  
地方安謐辦理尙爲妥速所有此案出力之徐州營守備李輔勝等准其查明分別請獎陣亡練總武生  
李同科馬崑朱錫三周長發民壯朱全王好著交部分別照例議卹其地方文武失察處分著一律寬免  
○甲戌子孫毓汶病假一月以徐桐兼署兵部尙書○諭御史熙麟奏嚴廷考試大臣閱卷是非倒置據  
實上陳一摺據稱本年朝考列入一等之戴錫之字跡模糊疎劣措詞失體詩亦不可解伍文珩卷詩中  
出韻皆以前列倖入館選本科新進士朝考李瑞清曹葆勛二卷皆已加簽而列入一等卓孝復吳維炳  
二卷並未加簽小楷均非不佳均置之三等曹元弼一卷筆畫脫落幾不成字轉列入二等各等詞即著  
翰林院掌院學士將戴錫之等七員原卷封固進呈另片奏本年庶吉士散館取列三等各員卷中塗改  
出韻失黏實非無心錯誤等語嗣後派出閱卷大臣務當秉公校閱如有文理批謬錯謬過多應列四等  
及不列等之卷不得意存遷就概行從寬以昭核實○張之洞奏光緒二十年七月十七日准總理衙  
門電稱本日本奉 旨現在軍務緊要所有前敵後路及沿海各軍絡繹雲集需用軍火等項必須先爲籌  
備源源接濟著李鴻章劉坤一查明南北洋各局所存如尙不敷應用亟應設法購辦子藥一項各局皆  
能自製即飭加工趕造務期充足敷用勿致臨時誤事是爲至要欽此當經本任督臣劉坤一欽遵 諭

旨分飭各局趕緊加工製造在案茲據金陵機器製造局江蘇候補道郭道直等詳稱陸續添募工匠購辦料物趕緊加造兼作晚工計自光緒二十年七月分起至十二月底止除常年額款製造軍火照數造解外所有加造軍火需用經費稟由江南籌防局撥銀五萬兩江南海關撥銀二萬兩先後共計加撥軍平銀七萬兩係在常年額領經費之外遵照定章先行詳請奏咨立案等情前來臣覆核無異除分咨總理衙門及戶部兵部工部查照外理合會同江蘇巡撫臣奎俊恭摺具陳下所司知之○乙亥召山東布政使湯聘珍回京○先是臺灣宣告自立署臺灣巡撫唐景崧以狀聞李鴻章以事出意外電致李經方暫勿前往淡水交地事候 旨再定至是李鴻章電致總理各國事務衙門接伊藤初三電稱樺山提督明日早晨可抵淡水本大臣詳審料量深信當此時節兩國特派大員會晤之期愈早愈妙此事極有關係極屬緊要是以本大臣盼望中國特派大員立即啟程不必以所慮艱難難過慮如萬一果有不虞樺山提督自必按照本大臣前寄貴大臣之電所陳者出力助護云聞臺灣已自立爲民主之國布告各國恐無出而援助者紳民義憤固無如何惟不應奉署撫唐景崧爲總統使 朝廷號令不行日本豈不明知必有責言慮生他衅李經方奉 命前往交地茲既無地可交此外各事無從過問伊藤乃催赴淡水會齊原係照約辦理李經方卽去亦不過作壁上觀戰斷難設法排解究應如何處置及經方應否速

往伏乞電 旨迅速指示機宜請代奏軍機大臣奉 旨李鴻章電奏已悉茲民劫制生變事出意外無從過問李經方既經照約派往若不速行轉令生疑伊藤電內既有出力助護之說自應剋日前往相機商辦即使不能排解彼亦無可藉口也○諭昨據熙麟奏殿廷考試大臣閱卷是非倒置當經諭令翰林院掌院學士將戴錫之等七卷封固呈覽戴錫之一卷疏語尙非失體詩多費解伍文瑄詩中出韻未經簽出李瑞清曹葆勳二卷簽出之處均屬筆誤吳維炳寫作尙屬可觀而越幅黏貼殊屬違式除伍文瑄業經改授知縣外戴錫之著改列三等三十九名並註銷庶吉士交吏部簽分省分以知縣用其餘原列等第尙非倒置均著毋庸置議卓孝復寫作俱妥著改列二等第一百名曹元弼一卷字跡模糊原置二等殊屬失當著降列三等五十名其原列三等第四名至五十名俾次第推陞所有原閱戴錫之卷之吏部右侍郎廖壽恆原閱伍文瑄卷之工部左侍郎汪鳴鑾原閱卓孝復卷之理藩院尙書啟秀原閱曹元弼卷之都察院左都御史徐郵均著交部查議○丙子准陸潤庠開缺回籍養親○以張國正爲山東布政使季邦楨爲福建按察使○戊寅以溥頤爲內閣學士○己卯諭依克唐阿奏請將革河嶺及海城等處陣亡並在營傷病身故員弁分別賜卹各摺片所有前經查明陣亡之儘先佐領騎騎校德恆雲騎尉恩陞巴彥吉爾嘎富徵五品軍功升補騎騎校領催金祥六品藍翎披甲德林六品軍功披甲永桂順昌

雙明監生雙有五品軍功披甲福多七品軍功披甲俊德六品軍功常成及此次所奏陣亡之協領德克  
德春守備鍾秀五品頂戴儘先外委韓景興六品頂戴儘先經制外委王全勝六品頂戴披甲奎海六品  
頂戴恩林喜貴李子英文會官學生馬世駿六品藍翎張焜六品軍功披甲格爾肯祥榮福恩六品軍功  
恩林明山兆福張月堂七品軍功徐天成傷亡之五品頂戴領儘德豐阿在營積勞病故之已革協領常  
明六品藍翎八品監生春和五品頂戴前鋒吉凌額均著交部從優議卹○諭宋慶奏查明毅軍歷次戰  
剿陣亡員弁續懇卹卹一摺所有游擊樞大勝副將銜游擊王玉福都司王明爾都司銜守備王玉昆李  
炳仁都司銜雲騎尉李賀秀雲騎尉楊樹藩守備朱長安楊得勝張自安劉金鎮李傳做楊敏修袁玉恆  
許長清守備薛洪鈞千總王振起張清元莊應祥趙連璧劉資高把總李雲鵬胡祥麟李萬春能安邦陳  
永安郭德勝章春發劉葆真高廷聘外委鄭銘盤李正立李家明軍功吳清雲韓振揚金來祥陳希智尙  
恆遠陳德順王至中千總全海修都起初外委張全忠張萬興郭華昌王克寬六品頂翎郭文會軍功王  
振標魏學勛江錫堂邱鳳山趙金城陳興邦張東方李恆山周應發萬學良劉得功時金盤王鳳翔侯家  
福徐元明蔡敬友劉學典萬從仁從九品龍在韜軍功孫玉福王桂揚均著交部照陣亡例從優議卹餘  
著照所議辦理另片奏請將死事尤爲慘烈各員懇恩建立專祠等語守備趙雲奇副將唐宗遠千總何

占魁三員前已交部從優議卹著再加恩准其於各該員死事地方及原籍建立專祠極大勝等語一併  
附祀死事地方專祠以慰忠魂○庚辰論本日侍郎會章奏散秩大臣儒恪翰林院侍讀學士準良聯銜  
陳奏事件該侍郎等雖得奏事惟本非同官即使意見相同亦應各抒所見單銜具奏何得率行連銜殊  
屬非是會章信恪準良均著交部議處○刑部奏光緒二十一年四月初一日准署北洋大臣山隸總督  
王文韶派員押解已革提督蔣希夷到部於初四日具奏奉 上諭刑部奏革員蔣希夷解送到京請旨  
辦理一摺蔣希夷應得罪名即著刑部遵照前有嚴行審訊按律定擬具奏欽此查已革提督蔣希夷前  
因營口失事經盛京將軍裕祿查明參奏於三月十七日奉 上諭本年二月間營口告急記名提督蔣  
希夷帶領各營並未迎戰節節退縮復捏報戰狀任意欺飾厥咎甚重蔣希夷並所部營官蔣廣隆等  
均著一併革職卽由王文韶拿解刑部分別治罪等因欽此嗣蔣希夷所部勇丁因該營剋扣餉銀不服  
遺散在天津地方聚眾毆打營官突開鎗礮以致驚擾居民奉 旨飭令王文韶查明具奏旋經查復奉  
上諭前因已革提督蔣希夷所部勇丁在天津河東地方因欠餉滋鬧飭查茲據王文韶奏稱營口失  
守該軍並未力戰相率潰逃此次帶勇來津尙不妥爲遺散復敢虛冒餉額任意剋扣以致全軍鼓譟幾  
釀事端前經裕祿參奏將該員革職拿解交部治罪茲據王文韶所奏各節情罪尤重著俟該革員解到



後嚴行審訊按律定擬等因欽此上等查裕祿原奏內稱蔣希夷所帶步隊五營經前奉錦山海道善聯派令同番幹臣等所帶海防練車馬步隊暨道標親軍四營分守營口嚴密保護地界善聯以賊蹤逼近令蔣希夷出隊迎擊蔣希夷藉詞遷延不進追賊已進街蔣希夷竟率所部各營先已退至田莊查蔣希夷所帶蔣廣隆等五營係善聯詳請奏留餉項勸集商捐招募成軍專為防守營口而設乃聞賊將至並未與賊迎戰輒帶領各營先退又節節退至石山站嗣接該提督來稟猶捏報在營口拒守嚴臺連日血戰與善聯所報情形迥不相符種種畏縮欺飾實屬毫無愧恥等語擬查王文韶原奏內稱蔣希夷於三月初一日率隊到津經辦理糧臺按察使胡燏棻按照山海關道來文該營應領二月分餉銀一萬四千五百四十九兩七錢又找領各款銀一萬九千七百五十二兩八分五釐除在營口發過湘平銀五千兩外應找給庫平銀二萬九千四百七十七兩二分八釐當即照數撥給匯豐銀行憑條於三月初二日面交該提督令其趕緊取銀核實放給妥為遣散以免各勇丁在津逗遛乃於初四日午後忽傳該軍在河東地方因索餉滋鬧將蔣希夷圍困釋放洋鎗勢甚洶洶附近鋪戶居民驚惶罷市胡燏棻聞信單騎馳往各勇丁紛紛棄械跪地聲訴該提督遍繳軍械號衣每名只肯給餉銀一兩以此衆心不服向其爭論胡燏棻恐激成大變當即剴切開導諭令迅速歸伍聽候核辦一面每名先給飯食錢文以定軍心當

向該提督追回公砵平銀一萬四千兩初五日辰刻胡燏棻帶同委員親往各營詳細點驗按名發給二月分餉始知該提督雖按五百人一營領餉人數並不足額實在勇丁每營約三百數十名至四百名不等統計五營三哨月餉雜費共核發庫平銀一萬三千五百兩六錢三分六釐當飭胡燏棻會同營聯將該軍餉項一律結清原領軍械盡數追繳乃該提督於餉項則任意狡抵於軍械則藉口遺失種種荒謬不可枚舉等語等檢閱各原奏將希夷統帶各營於賊犯營口時並未悉力抵禦輒相潰逃復捏報戰狀及帶勇來津尙不妥爲遣散又敢虛冒餉項任意剋扣以致全軍鼓譟釀事端實屬情罪重大當卽遴派司員援照原奏各節逐層嚴鞫正在提訊間據軍機處交片聲稱查兵部將希夷係保舉副將銜儘先游擊於同治二年因事摘去頂戴三年於賊勦髮逆案內開復又同治四年於各軍攻拔張家寨案內保以副將留河南儘先補用五年復因事革職留營是年十二月於截勦上蔡等處賊匪案內寬馭原銜頂戴翎枝六年復因事革去副將銜七年於勦平張逆案內請開復原銜翎枝經部行查尙未查覆等語飭令承審司員一併根究據將希夷供係安徽亳州人由軍功得保副將光緒二十年八月間奉裕祿調赴營口同營聯商辦防務募成步隊五營歸革員統領另招一營歸營聯自統及海蓋失守營口亦已喫緊無如營聯所購軍械始終並未運到十二月間賊犯營口均經革員擊退本年二月間吳大澂失守牛

莊宋慶各軍回顧田莊寨營口空虛初十日賊大股來犯營聯原派王得意馬占魁等守雙門革員所部五營分別戰守賊又分三路而來比至雙門營聯與王得意相率退走賊即由雙門攻入革員支持不住亦渡河退至田莊寨賊即躍至十二十三兩口賊又來犯革員同宋得勝等迎擊致將革員坐馬打死哨官蔣繼昌等陣亡傷斃兵丁多名旋同宋慶退至雙臺宋慶令革員赴石山站等候旋接營聯咨稱營口已失所帶五營回津遺散革員與營聯而結應行找領銀兩由營聯給咨向東征糧臺支領革員於二月初到津屢向糧臺催領至三月初三日始撥給匯豐行銀票二萬九千四百七十七兩二分八釐當即往取票內漏蓋糧臺帳房圖記不肯付銀往返耽延只得至次日再往取銀詎胡燏棻先至河東點名向各勇吩咐餉銀業交革員及革員至河東不料各勇聽胡燏棻之言向革員鼓譟索要正餉並遣散恩餉經胡燏棻說明情由當即無事遂將二月餉銀一萬四千兩交胡燏棻關放等語請以原保本係副將何忽假冒提督據供伊止保有副將因事參革復奏保開復銜翎關實至在營誤構提督緣伊與前山東巡撫張曜同日同事於肅清捻匪時曾接張曜函稱已代保提督伊信爲實遂向傍人告稱曾保舉提督並未敢妄稱奉有諭旨請以兵勇鼓譟之由據供委因銀票連日未經取出以致發放遲延勇丁因而胡燏棻餉銀全交革員之言懷疑滋鬧實無每人止肯給銀一兩情事請以胡燏棻援有營聯來函亦以蔣希

夷開銷招費及製造各款諸多浮冒每營勇丁缺額甚多又經胡燏棻按名點驗每營人數約三百數十名至四百名不等可知該營人數既不足額其他款之浮冒自不待言據供各營在營口接仗時傷亡已多兵勇既知道散沿途又不免逃走比至天津勢難足額至招費及製造各款均有文移可憑如果浮開營聯於結算時豈肯照數核給請以所領銀票係二萬九千四百餘兩交給胡燏棻之一萬四千兩據稱係勇丁二月分正餉何以經胡燏棻核實散放尚餘銀四千兩其中顯係浮冒且該革員在糧臺支領銀數除交胡燏棻放餉之外該革員仍實剩銀一萬五千餘兩究係作何開銷據供各營行糧每名應放月餉四兩二錢伊按人數核明交給胡燏棻銀一萬四千兩因胡燏棻照坐糧每人月餉止於三兩六錢故多出銀四千兩伊果有意剋扣何不少交給胡燏棻銀四千兩至伊開報招費及製造各款營聯均憑公事算給實無浮開情事當由該革員另繕清單呈遞核計所剩銀一萬五千餘兩大約伊置買器械並購發車價馬匹各款請以所領軍械緣何不肯呈繳據供實因遺失過多並開單呈閱等語查蔣希夷所犯罪名以失陷營口爲最重其以副將冒稱提督前因接據張曜函稱代保提督伊卽信以爲真遂自居爲提督惟尙未遣有憑劄與有所求爲詐冒假官者不同律應免坐至所領銀票二萬九千餘兩據王文韶疏稱接據營聯來函已稱其諸多浮冒卽所交胡燏棻之一萬四千兩除各勇丁二月正餉放完仍餘銀

四千兩又經胡燏棻按名點驗各營人數俱不足額該革員所供胡燏棻未照行糧每人四兩二錢之數發放銀有盈餘及勇丁傷亡逃走故兵不足額等詞殊難憑信第所餘銀四千兩業經胡燏棻追出該革員尚未入己未便復行計賊科罪其餘銀一萬五千餘兩據供均係伊先前隱發各款細核所呈清冊誠未敢遽信爲一一核實但既由營聯核明撥給均有公事可憑且數目均相脗合究竟其中有無侵欺浮冒中飽實無從句稽總之蔣希夷統帶各營駐守營口係由營聯集捐助餉招募成軍原爲保障地方起見則守禦營口自是該革員專責當賊人進犯之時該革員自應激發天良力圖効命乃未戰先退相率潰逃猶復捏報戰狀任意欺朦不獨裕祿謂其退縮欺飾實爲失事之由卽王文韶所稱接據前敵營務處袁世凱電報亦與裕祿所奏相符可知該革員所供力戰不支等情全不足信再三究詰該革員亦俯首無辭情甘認罪應卽擬結查律載守邊將帥被賊攻圍城寨不行固守而輒棄去因而失陷者斬監候等語此案已革副將蔣希夷統帶防軍駐守營口由各商民捐資助餉籌駐富亦不易原冀藉資保衛迨至寇氛逼近始則藉口遷延不肯迎敵繼則相率奔逃節節退避非託辭於器械不精卽藉口於眾寡不敵種種情形無非飾詞狡卸及至天津又不將所部妥爲遣散致令兵丁鼓譟幾釀事端其平日統馭無方已可概見雖尅扣浮支查無確據而偵軍失事貽誤邊疆厥罪誠無可逭自應按律問擬已革副

將蔣希夷除部兵聚眾滋鬧各節輕罪不議外合依守邊將帥被賊攻圍城寨不行固守而輒棄去因而失陷城寨著斬監候律擬斬監候秋後處決惟係統兵大員仍恭候 欽定 上諭刑部奏審明革員蔣希夷按律定擬罪名請旨遵辦一摺已革副將蔣希夷著照該部所擬斬監候秋後處決○辛巳飭南洋廣東禁止私運軍火勇丁赴臺○壬午諭軍機大臣等前據美使函稱接日本電已派林董爲駐紮中國使臣當經總理衙門商令美使轉告日本暫緩前來茲據覆稱兩國須將各事商辦完竣不必展緩等語現聞日使即將抵津著李鴻章王文韶俟其到時卽行接待欵留並派李鴻章王文韶爲全權大臣與日本使臣商辦事件不必先令來京以免周折該使如察看文憑著卽摘錄諭旨令其閱看○李鴻章電致總理各國事務衙門轉使齊電頃英廷接唐撫電告臺灣變民主眾舉爲總統英擬不覆云鴻想各國皆必不覆我國須自立腳步以免日後有口舌憑各國公論是非斟酌辦理總理各國事務衙門以開得旨李鴻章電悉前因臺民變亂據爲島國已令文武各員內渡此後無從過問昨又電令南洋廣東禁止私運軍火勇丁赴臺此卽自立腳步之意如日使言及此事著李鴻章王文韶切實告以和議既定中國決無噤令臺民自主之理勿聽洋報謠傳致生疑慮○諭王文韶奏永平等屬被災較重懇恩緩徵糧租一摺直隸永平遵化兩府州屬本年四月間暴雨疾風晝夜不息廬舍民田猝被淹沒該處頻年災重

之區貧民益形困苦現值青黃不接若將新舊糧租照常徵收民力實有未逮加恩著照所請所有永平遵化二府州屬應徵光緒二十一年新賦並節欠一切正雜錢糧旗租等項均著緩至秋後啟徵並減差徭以紓民力○癸未日人攻取基隆臺灣大亂前署臺灣巡撫唐景崧遁回廈門○諭督辦軍務王大臣奏提督董福祥請假省親據情代奏一摺覽其所呈情詞懇切出於至誠惟董福祥現在總統甘軍一切訓練事宜正資得力未便遽允所請該提督忠勇樸誠朕所深悉際此時艱當思力圖報稱用副朝廷委任至意○甲申方汝翼因病乞休允之以魏光燾爲江西布政使○先是 朝旨命李經方尅日赴臺由李鴻章轉電飭遵密授方略並電告伊藤以臺灣紳民已自立爲民主國不服我國家號令李經方必亟呼應不靈且恐激生意意外之變回憶西五月十七日即申四月二十三日貴大臣來電按照兩國批准馬關和約臺灣所有主治地方之權業已交與日本其了結地方變亂之法勿庸兩國會議中國政府只須將治理地方等事交與日本所派大員云云是李經方到淡水後自應查照貴大臣前電語意與樺山提督會商想樺山自能設法辦理中國無從過問祈貴大臣電致樺山提督格外原諒通融辦理云於是李經方遵 旨於五月初七日啟程赴臺交地事旋即就緒至是李鴻章電致總理各國事務衙門稱李經方自上海來電本日申正平順回滬舉事交接清楚甚順手餘詳續電云請代奏又電稱李經方文電

商辦交接臺灣節略佳已電自淡水發後開赴基隆中正抵基隆口外之海灣名三雕澳船泊定樟山請  
初十已正相見屆時往晤樟山云奉命來臺以爲和約批准交接甚易乃伊藤接中國政府電告臺事棘  
手始帶領水陸各軍到淡水後派小兵輪欲進口知照華官華兵開礮要擊故來基隆又爲華兵鎗礮轟  
擊不得已暫住三雕澳現陸軍一萬已登岸日內可取基隆經方答以奉 命照約來此將與貴委員商  
辦事件臺灣如何交接望先明告樟山云諸事棘手交接甚難俟我攻取基隆到臺北府後再徐議交接  
經方云和約批准伊藤自認中國已將臺灣治理事權交與日本此來照約將堡壘軍器工廠及屬公物  
件交與貴委員耳臺民已變豈能登岸一點交我自馬關回臥病已久在滬調治奉 有力疾前來此  
處風濤險惡不能起立若候貴委員登岸到臺北府不知何時全臺地方甚大民變非一日可平恐非數  
年不能交接清楚今兩國和好須按照友誼和衷商辦不可強我所難伊云雖然如此交接事大不能遷  
就辯論至末初經方昏眩坐不能定樟山云請回船我卽來商議經方爲多人扶回樟山未正來拜首云  
和約批准願兩國實心和好永遠不改符以誠然伊云既如此何以淡水基隆中國兵丁皆放鎗礮要擊  
此處復見有華官告示令軍民人等抗拒符以和約批准後 大皇帝既派我來臺帶有全權交接臺灣  
且 特旨令文武各官陸續內渡此爲兩國實心和好憑據臺民不服生變何事不爲淡水開鎗我未目



見不知虛實但據貴委員之言想必團練士兵所爲風聞楊提督等已內渡其餘文武各官雖爲臺民刻  
留未能遵旨一律內渡民不奉朝命官久無檄告示皆臺民所爲官豈能過問辯詰數時伊云但願  
抗拒各事如貴委員所說非官與兵所爲經方覆云交接之事究竟如何辦理樺山云早間所說卽是辦  
法經方云固執過甚似非和衷樺山云我甚和衷但辦事不得不然今見貴委員病狀艱連若久留於此  
萬有不測我實疚心但交接之事貴委員如何辦法經方答以照約辦理外無他法樺山云須有清單經  
方云非地方官何從開清單此時民變將來不定後衙署文卷何從查攷終無清單和約內既無清單字  
樣何必多立名目強我所難伊云清單任貴委員如何寫法總須有此名目方合款式經方云於清單內  
寫一臺灣全島澎湖全島之各海口並各府廳縣所有堡壘軍器工廠及屬公物件伊云太含糊經方云  
強我開清單祇能如此不然卽請將清單二字刪去伊見方詞意甚決始允照辦樺山又云山臺灣至福  
建之海纜係臺灣屬公物件伊須照收經方云海纜非岸上產業何能交讓況海纜登岸非兩國政府議  
明不能我未奉命商辦此事無此權力且和約內未言及伊云既然如此祇好寫明臺灣至福建海纜  
應如何辦理之處俟兩國政府隨後商定彼此辯論自未正至酉正始定議樺山卽命其參贊先將漢文  
東文清稿交方閱看其稿措詞尙合和約因與福士達商酌福云此文據但照鈔和約於和約外不增減

一字實爲簡明妥洽非其意料所及勅方即刻署名蓋印恐稍遲有變另坐枝節亥正卽彼此署名蓋印  
事畢十一子刻開船本日申正到滬感受瘴癘病益加劇乞將問答節略核酌代奏至交接文據卽續鈔  
電云請代奏又電稱李經方電稱交接臺灣文據內載 大清帝國 大皇帝陛下及大日本帝國大皇  
帝陛下爲照在下之關所定和約第五款第二條交接臺灣一省 大清帝國 大皇帝陛下簡派二品  
頂戴前出使大臣李經方大日本帝國大皇帝陛下簡派臺灣總督海軍大將從二位勳一等子爵樺山  
資紀各爲全權委員因此兩全權委員會同於基隆所辦事項如左中日兩 帝國全權委員交接光緒  
二十一年三月二十三日卽明治二十八年四月十七日在下之關兩 帝國欽差全權大臣所定和約  
第二款中國永遠讓與日本之臺灣全島及所有附屬各島嶼並澎湖列島卽在英國格林尼次東經百  
十九度起以至百二十度止及北緯二十三度起至二十四度之間諸島嶼之管理主權並別冊所示各  
該地方所有堡壘軍器工廠及一切屬公物件均皆清楚爲此兩 帝國全權委員欲立文據卽行署名  
蓋印以昭確實光緒二十一年五月初十日明治二十八年六月二日訂於基隆繕寫二分 大清帝國  
欽差全權委員二品頂戴前出使大臣李經方大日本帝國全權委員臺灣總督海軍大將從二位勳一  
等子爵樺山資紀臺灣全島及所有附屬各島嶼並澎湖列島所有堡壘軍器工廠及屬公物件清單一

臺灣全島澎湖列島之各海口並各府廳縣所有堡壘軍器工廠及屬公物件一臺灣至福建海綫應如何辦理之處俟兩國政府隨時商定云乞代奏 上諭軍機大臣等李鴻章三電均悉臺事既經李經方與樺山交接清楚立有文據此後臺灣變亂情形即與中國無涉應由李鴻章電知伊藤以爲了結此事之據至海綫如何辦理應飭電局預爲籌議以備隨後商定前派李鴻章王文韶爲全權大臣與日使商辦事件該使有無來津消息並著探明電聞○乙酉 上御文華殿法國使臣施阿蘭俄國使臣喀希呢相見○諭溥齡等奏應修河道泊岸各工請派員查驗一摺 惠陵河道泊岸等處應修工程著派英年敬誥查勘奏明辦理○丙戌電 諭楊昌濬本日有人奏微匪生變始因爭教涉訟地方官有索賄情事遂致激而生變等語著該督確切查明先將辦理不善之員從嚴參辦毋稍徇縱○己丑諭祥曹等奏本日據午門值班章京希鐸呈報今日辰刻見有三人肩搭紫色木形色慌張意欲溜出當即向前盤拿該犯等言語支離堅不吐實嗣係偷竊得贓乘間潛逃禁城重地豈容宵小混跡著將該犯張殿甲張德元劉福等一併送交刑部嚴行審辦嗣後該統領等務當嚴飭各門值班章京等認真稽察毋得稍涉疎忽○壬辰與日本國訂交還奉天省南邊地方條約七款 第一款 日本國自願將明治二十八年四月十七日即光緒二十一年三月二十三日訂立下之關和約第二款中國讓與日本國管理之奉天省南

海地方原劃疆界地圖從鴨綠江口抵安平河口至鳳凰城海城及營口而止以南各城市邑以及遼東  
海岸黃海北岸奉天所屬諸島嶼均永遠交還中國以後與日本無涉因此將原約第三款並擬訂立  
陸路通商章程之事作為罷論 第二款 中國約為酬報交還奉天省南邊地方允給銀三千萬兩迨  
於明治二十八年十一月初八日即光緒二十一年九月二十二日交與日本國政府 第三款 中國  
允將本約第二款所開之酬款銀三千萬兩交與日本國政府自訂立本約之日起三箇月以內日本國  
軍隊從該交還地方一律撤回又自本約署名蓋印之日起該交還各地方內所有衙署公所工廠船廠  
及一切屬公物件日本文武軍隊不得毀壞搬遷並俟某處城鎮軍隊撤回時由日本全權公使接約知  
照中國政府轉飭中國收地印委各員驗收 第四款 中國約日本國軍隊占踞之間所有關涉該國  
軍隊之中國臣民概予寬貸並飭有司不得擅為糾繫 第五款 中國倘不將本約第二款所開之酬  
款迨於明治二十八年十一月十六日即光緒二十一年九月三十日交與日本國政府其仍占踞交還  
地方之日本國軍隊帶費全數均歸中國政府算給倘款已照付日本軍隊尚未如期一律撤回應由日  
本代認三箇月五釐息銀 第六款 本約繕寫日本文漢文及英文各二分校對無訛署名蓋印漢文  
與日本文遇有解譯字義不同之處以英文為憑 第七款 本約欽奉 大清國 大皇帝大日本國

大皇帝批准自署名蓋印之日起二十一日內在北京互換○甲午邊寶泉奏欽奉 上諭戶部奏籌餉緊要續擬數條請旨遵行一摺嗣後茶糖斤加釐土藥行店捐輸各條均著照所請行等因欽此並准戶部鈔摺咨行到閩當經轉行遵辦在案茲閩省善後稅釐兩局司道詳稱伏查閩茶每百斤徵起運稅銀一錢運銷稅銀六錢釐銀六錢三分六釐軍餉銀三錢加捐軍餉銀三錢二分八釐其銀一兩九錢六分四釐零科則本已不輕邇來洋人抑勒茶價茶商類多虧折以致徵收稅釐年遞一年且茶葉為內地土貨各商之不敢走子口者尙知以國課為重倘不量予體恤再令加釐商人無利可圖習良者因而歇業狡黠者必至冒串洋商請單採運於原額稅釐大有窒礙且以一再加捐軍餉勢難復加糖貨產自下游以泉漳為最近子口洋單盛行無徵糖釐不過三四千金卽加徵兩成亦屬無濟於事小民錙銖必較燭利若蠶一聞加釐難保不羣趨子口夫增釐藉以濟餉必極其利之大小而後可若所得者小所失者大無益而反有害曾不如循舊之為宜至土藥一項閩省均徵之於零星小販所收釐銀積銖累寸不過萬有餘兩既無專販之客商亦無專售之行店更屬無從捐辦等情前督臣譚鍾麟未及核辦移交前來臣覆加查核均係實情下戶部知之○乙未李鴻章等電致總理各國事務衙門日使林董於本日已正來謁會同文韶接晤寒暄數語後詢其接伊政府電信否林云昨到京始接伊藤等電稱中堂與王大人

已奉派全權大臣會商事件惟照通例駐京使臣應先赴京到任呈遞國書覲見答以中朝向無一定辦法有公使到任數年或數月始覲見遞國書者現值天氣炎熱未知我大皇帝接見方便否兩國既經和好早遲必准覲見何必急急林云我奉朝命不敢違必須先進京往總署請示儻令我回津商議公事我可再來鴻等詢及遼東何時退還日兵何時撤還林云我啟程時三國正議此事遼東已歸各處之兵已逐漸撤回但一時尙難撤完詢以我前敵各軍探報海城營口尙添兵林謂必是各營間有調換誤報添兵斷無其事林又商及照約兩國俘虜應各送還廣島海城有華兵俘虜一千六百人當卽分送惟照通例應由華籌給送還但爲數無多俟其行文到日分別辦理聞臺灣有信否林云久未接樺山信只知已到基隆餘無他言詢其何日進京云俟酌定水陸路程再告知以上各節無甚狡強鴻等不便強留致失和氣俟其抵京鈞署再妥酌應付請先代奏奏入軍機大臣奉旨李鴻章電奏已悉日使擬先赴京到任呈遞國書俟有起程日期卽行電聞並飭沿途地方妥爲護送前據李經方電稱現因患病未能入都等語著李鴻章傳知該員俟病痊再行來京○諭軍機大臣等有人奏宛平縣民人周英等聚斃民人翟九之工人高盛得一案地方差役串通捏稟該縣酷刑逼令周順認兇周英等反得置身事外等語著順天府確查實在情形秉公訊辦以成信讞○諭軍機大臣等有人奏酷吏殃民請飭查辦一摺據稱山

東平原縣知縣王之幹疏請食舉於軍情緊急之時奉飭辦團延不舉辦任用劣幕丁書需索各項陋規又因案勒贖災不辦聽信惡役誣良爲盜浮收漕米侵吞入己以致民怨沸騰等語著李秉衡按照所參各節確切查明據實具奏無稍徇隱原摺著鈔給閱看將此諭令知之○丙申諭戶部奏償款太鉅請飭通盤籌畫一摺當此時事艱難國用匱乏中外臣工各宜合力同心共圖匡濟著戶部咨行大學士六部九卿暨各直省將軍督撫各抒所見如有可興之利可裁之費能集鉅款以應急需者卽行詳晰陳奏用備朝廷採擇○諭徐桐奏外省釐差鹽務關務開員甚多內地腹省並無軍務藉口彈壓多招勇營安插私人歲糜鉅款請飭痛加刪減等語近來仕途冗雜營謀各項差務濫支薪水甚或侵漁肥己竊國病民此等惡習皆由大吏瞻徇情面不肯認真懲剔以致浮費日多正項轉絀亟應大加整飭著各直省督撫卽將營局各員核實裁減毋許濫竽充數以挽積習而杜虛糜○丁酉諭軍機大臣等王文韶奏獻縣村民藉災滋事委員查辦一摺村民藉災毀隄毆官搶局實屬肆行無忌著王文韶督飭卽委各官嚴拿爲首滋事之人按律懲辦並將此案滋事緣由及委員等辦理情形分別查明據實覆奏總期寬嚴互用早日辦結以靖地方將此諭令知之○戊戌中法續議商務專條附章成其文曰茲值中越邊界沿至湄江業已勘定 大清國 大皇帝大法民主國大伯理爾天德均願在該邊界一帶鼓勵兩國通商往來

展拓興旺並照

光緒十二年三月二十二日  
一千八百八十六年四月二十五日

一在天津互訂商約及

光緒十三年五月初六日

一千八百八十七年六月二十六日

在中國京都續議商務專條使之辦理妥當是以定議另立此次附章內載新添數節並就前立各約章量加更改數節是以 大清國 大皇帝欽差全權大臣管理總理各國事務衙門和碩慶親王總理各國事務衙門大臣軍機大臣吏部左侍郎徐大法民主國大總理天德欽差全權大臣賞給佩帶四等榮光寶章黑山國自主大星日國囉囉斯第三大星義國冠冕大星出使中國全權大臣施各將所奏全權文憑互相校閱均屬妥協立定條款如左 第一款 現由兩國議定廣東邊界與越南芒街相對之順興街法國任派領事官駐劄以利邊界捕務至兩國官員會同巡查中越邊界應日後商定章程以憑辦理 第二款 兩國於光緒十三年五月初六日在中國京都互議續約之第二條現已改定如左以全其事兩國議定法越與中國通商處所廣西則開龍州雲南則開蒙自至蒙自往保勝之水道允開通商之一處現議非在蠻耗而改在河口法國任在河口駐有蒙自領事官屬下一員中國亦有海關一員在彼駐劄 第三款 議定雲南之思茅開為法越通商處所與龍州蒙自無異即照通商各口之例法國任派領事官駐劄中國亦駐有海關一員至法國領事官所住公館由地方官相幫照拂其法國人民及法國保護之人前來思茅均照咸豐八年五月十七日條約第七第十十一十二等款及光緒十二年



三月二十二日商約第三款辦理其運往中國各貨物准由水道如羅梭河湄江等河運入並准由陸路如猛烈或倚邦至思茅普河之官道其貨之有應納稅項者即在思茅輸納 第四款 光緒十二年三月二十二日商約第九款現議改定如左 一凡邊界所開之龍州蒙自思茅河口通商四處若有土貨經過越南來往出此口時應照十分減四之例收稅專發完稅憑單帶同貨物到彼口時免徵進口之稅 一由以上四處運土貨出口前往沿海沿江通商各口於邊界出口時應照十分減四之例收出口稅 專發完稅憑單帶同貨物前往俟到沿海沿江通商口岸應照沿海沿江各通商口岸同項土貨通例完稅復進口半稅 一凡有沿海沿江通商口岸運土貨經過越南前往以上四處於出口時徵收十成正稅專發完稅憑單帶同貨物前往俟到邊關進口時按照十分減四徵收復進口半稅 一以上各土貨若帶有上項專發憑單出口者未經各關以前復進口者已經各關以後均應照土貨例辦理 第五款 議定中國將來在雲南廣西廣東開礦時可先向法國廠商及礦師人員商辦其開礦事宜仍遵中國本土礦政章程辦理至越南之鐵路或已成者或日後擬添者彼此議定可由兩國酌商妥訂辦法接至中國界內 第六款 法國與中國於光緒十四年十月二十八日在烟臺互定電報接續條款第二款內應添一節如左 四思茅屬至越南應由中國思茅電局與越南之孟阿營卽下猛巖電局互相接續

其電報價目應查照上項烟臺條款第六款定明 第七款 兩國議定此次附章通商各條既係專章彼此因龍州河口蒙自思茅與越南往來必須相讓而立者所載一切利益兩國人民及所保護之人祇可在以上所定邊界處所及陸路水道援以爲例 第八款 以上各條視如光緒十三年五月初六日續約所載一體施行 第九款 中法兩國前立各條約章程除由現議更改外其餘仍應一體遵守至此次續約現由 大清國 大皇帝批准俟大法國大總理璽天德批准後即在中國京都互換 附中法續議中越邊界會巡章程大款 第一款 兩國派員會同巡查中越邊界 一節 兩國應行會同巡查中越之邊界分三段第一段廣東省與越南接壤邊界第二段廣西省與越南接壤邊界第三段雲南省與越南接壤邊界 二節 以上所開三段各由中法兩國選派一大員會同督辦巡查事宜 三節 法國各督辦大員於其責成巡查一段各事宜均准飭令該段邊界越南境內文武各官遵辦專受駐越大臣節制中國各督辦大員於其責成巡查一段各事宜均准飭令該省文武各官遵辦專受該省督撫節制 四節 法國督辦大員第一段駐紮芒街第二段駐紮諒山第三段駐紮保勝中國督辦大員第一段駐紮東興第二段駐紮憑祥第三段駐紮河口 五節 每段中法兩督辦大員所駐之處以德律風或電綫相接以便隨時通信 第二款 如何巡查之法 六節 巡查邊界以對汛各駐本國

官兵 七節 每處對汛以法國一汛中國一汛住邊界通衢中越兩邊相望之處而設遇有地勢不宜  
紮營處所則於或左或右斜角遙對亦可總期兩邊相望聲氣可通 八節 中法各汛至少駐官兵三  
十名各有軍械每汛以一弁管帶 九節 中法各對汛一俟能設德律風或電綫之時應及早相接以  
便隨時通信 十節 對汛所設之處開列於後一芒街與東興二北市與里接三橫模與冷洞四越南  
峙馬與中國峙馬五同登與南關六越南平而與中國平而七那爛與布局八畝龍與水口關九越南里  
板與中國里板十朔江與平孟 十一節 以上所開各對汛將來准由兩國先期知照會同商酌增刪  
挪移至演越邊界對汛暫且不定 第三款 陸路邊界辦理巡查條規 十二節 按照光緒十一年  
四月二十七日中法兩國在天津立定條約凡有法國人民及法國所保護人民與別國居住北圻人等  
欲行過界入中國者須俟法國官員請中國邊界官員發給護照方得執持前往倘由北圻入中國者係  
中國人民只由中國邊界官員自發憑單可也至有中國人民欲從陸路由中國入北圻者應由中國官  
請法國官發給護照以便執持前往 十三節 兩國民人往來之路現章未曾另立之先只准一律由  
第十節所開十路出入凡有發給護照憑單務須注明其人准由何路過界 十四節 護照憑單應於  
過界時到法國對汛呈驗該汛弁簽字到中國對汛呈由該汛弁驗明 十五節 兩國人民及別國寓

居北圻人等有因生理通商耕種之故必須輪次過界在界限之兩邊暫住者可由兩國地方官對汛汛弁會同發給過界長行准單無庸照十二三十四等節辦理 十六節 以上所開長行准單均應按年於西歷正月初一至初十日一換惟須先一月知會中國官員轉行周知 十七節 長行准單應由兩國發給之員弁冊報本國督辦大員存案 第四款 聚眾生事並股匪執械辦理巡查條規 十八節 越南界內報有股匪聚會一經聞信法國汛弁即當飛行轉知該對汛中國汛弁並聲明該段邊界法國督辦大員 十九節 中國界內報有股匪聚會一經聞信中國汛弁即當飛行轉知該對汛法國汛弁並聲明該段邊界中國督辦大員 二十節 於是兩督辦大員會商妥法各自轉飭所轄查拏聚匪至中法督辦大員會商辦法轉飭汛弁遵行應由每對汛中法兩弁奉飭後即行互相通知 二十一節 每遇事機急迫中法對汛兩汛弁應即徑行會商查緝之法各自報明本國督辦大員 二十二節 凡有匪徒在越南境內被法軍追迫過界入中國者即由就近法國對汛知照中國對汛或有追匪之法軍管帶知照就近中國軍兵管帶俾中國軍兵迅速接追捕獲遇有匪徒由中國境內過界入越南者應由中國對汛或勘匪之中國軍兵管帶速即知照法國對汛或就近法軍管帶俾法軍即行接追捕獲至如此接追知照倘有稍涉疏忽遲延之汛弁管帶等員即應查問重辦一經本國擬定知會彼國督辦

巡查該段邊界大員 第五款 責成督辦巡查大員及各對汛汛弁 二十三節 凡中法督辦大員有不遵現章定明職分者即由兩國大臣彼此各行查明應歸之咎俟此國擬定罰辦處分知會彼國仍各按本國律例辦理 二十四節 中法對汛汛弁或中法軍營營帶有不遵現章所定職分者即由該段邊界中法督辦巡查大員彼此各行查明仍各按本國律例酌定罰辦並知照彼國該督辦大員 第六款 越南羣島辦理巡查條規 二十五節 凡中國人之船艇駛往越南水面應領有原出之口法國領事地方等官或原出之口中國海關地方等官發給蓋印准單注明船載丁口貨色前往處所其有近村船艇或因趁墟或因渡人勢難一一令其注明船載丁口應由各地方官發給護照准其駛行惟遇有事應向發給護照之地方官是問其丁口貨物應免逐一瑣注 二十六節 此項駛船准單若遇法國兵艦或越南海關巡船查驗應即呈閱 二十七節 如前查驗應先空放一鎗或一礮示知若須再行空放一鎗一礮亦可備有不睦空放鎗礮查驗准單之船艇即或疑為匪船辦理亦屬自召 二十八節 凡中國人之船艇駛近越南海邊處所應將前領第二十五節所載發給之准單呈由關口或地方官查驗簽字○中法續議界務專條附章成其文曰兩國前派勘明中國與北圻邊界永段自紅江至湄江現已竣事經 大清國 大皇帝欽差全權大臣管理總理各國事務衙門和碩慶親王總理各國事

務衙門大臣軍機大臣吏部左侍郎徐大法民主國大伯理璽天德欽差全權大臣賞給佩帶四等榮光  
寶星黑山國自主大星日國噶羅斯第三大星義國冠冕大星出使中國全權大臣施各執所奉全權文  
憑互相校閱均屬妥協並代各本國將

光緒三十三年五月初六日 一千八百八十七年六月二十六日

互訂續議界務專條更正修全

除兩國委員互立符押之節略界圖各件均行定准外彼此商定辦法開列如左 一滇越邊界第二段  
自丁字處起至戊字處止界綫改繪如下界綫自丁字處起向東北至漫美止又自漫美向東至清水河  
之南納止漫美歸越南猛崗上村猛崗山猛崗中村猛崗下村各地歸中國 二滇越邊界第五段自龍  
膊寨起至黑江止界綫改繪如下自龍膊寨雪南越南第五段界綫溯龍膊河至紅崖河入龍膊河之處  
卽圖上甲字處爲止自甲字處向西北偏北順分水嶺至平河發源處又順平河水起河至木起河注打  
保河之處又順打保河至打保河注南拱河之處又順南拱河至南拱河注南那河之處爲止又界綫溯  
八寶河至八寶河與廣思河合流之處又溯廣思河卽順分水嶺以至南辣比與南辣河相注之處又順  
南辣河至南辣河注黑江之處又從黑江中心至南馬河卽南納河爲止 三滇越邊界自黑江與南馬  
河相注之處起至湘江止繪定如下自南馬河注黑江之處界綫順南馬河至河源處止又向西南又向  
西順分水嶺至南桿河南烏江兩水發源處又自南烏江發源處界綫順南烏江與南腊河並各支河中

間之分水嶺其西邊之漫乃倚邦易武六大茶山等處歸中國其東邊之猛烏烏得化邦哈當賀聯盟猛地各處歸越南又界綫以南北向東南向至南嶽河發源處又順分水嶺以西北偏西向繞南殺河及注南腊河南岸諸水發源之山以至南腊河注湄江在於猛彝西北之處而止其猛莽猛濶之地歸中國至八鹽泉之地仍歸越南 四將來兩國各派官員前往邊照勘界委員所繪簽押各圖及此次界務附章所載會同辦理安設界牌事宜 五中法兩國前立勘界各件除山現議更改外其餘仍一體遵守至此次專條附章並光緒十三年五月初六日續議界務專條現由 大清國 大皇帝批准俟大法民主國大總理囑天德批准後即在中國京都互換○庚子大祀 地於 方澤 上親詣行禮○諭劉坤一奏山西練軍分別遣留歸併請將統領革職一摺山西練軍統領賀星明所部勇丁多以疲弱充數且於撤差後尤復事發酬銀並置交洋鎗至六十五桿之多實屬庸劣不職記名總兵賀星明著卽行革職交鎗枝並著照數賠繳餘著照所議辦理

光緒一百二十八

臣朱壽朋敬編

臣潘鴻鼎恭校

閏五月辛丑朔諭李秉衡奏山東昌邑縣竄役劉古玩平時爲盜狡詐兇惡上年秋間兵差過境該署縣張鴻憲備飭令僱車該役聚眾刁難復向民間藉差訛詐小民受其搏噬不敢告發似此竄役殃民最爲地方之害業經李秉衡提訊正法足昭炯戒第念山東如此他省恐亦不免著通飭各直省督撫隨時訪察如有竄役殃民卽著從嚴懲辦以除積竄而安良善○壬寅太僕寺卿林維源因病奏請開缺允之○甲辰孫毓汶因病奏請開缺不允予假一月調理○准大學士福錕致仕仍賞食全俸○以松壽爲山東按察使○諭刑部奏審明太監致斃人命按律定擬一摺太監門進懽著照該部所擬絞監候秋後處決○丙午調戍邊爲鑲紅旗滿洲都統以依克唐阿爲鑲黃旗漢軍都統○以啟秀爲總管內務府大臣○丁未諭軍機大臣等有人奏浙省盜風熾肆請飭認真搜捕一摺據稱浙江洋面劫案疊出上年岱山剪刀坪一帶盜匪與台州漁戶搆毀幾釀巨禍舟山航船去冬亦被行劫內地如鄞縣小溪大嵩奉化之忠義松林等處皆成盜藪竄竄縣城外本年春間被劫之家不下數十姓有盜首尤田難者在奉化



招集匪徒三四百人白晝搶掠出入乘坐官輪漁船出行必須領其盜照方可開駛等語果如所奏實爲地方之害著廖壽豐嚴飭文武員弁認真巡查實力搜捕以靖盜風並尤田雞一名嚴拿務獲從嚴懲辦縣官有諱飾消弭廢弛捕務者並著卽行奏參另片奏鎮海口防營徒糜帑項提督張其光昏濫廢弛副將費金綬知府馮相榮惟以吸食鴉片煙爲事參將鄧鵬保日事賭博在營納妾並干預地方訟事總辦支應局縣丞吳元鼎挾妓侑酒毫無顧忌堵塞海口需用船隻木椿勒索浮冒等語著廖壽豐嚴切查明據實具奏毋庸徇隱至所稱此項防軍毫無紀律裁撤恐滋事端請飭籌備餉銀於資遣時派員押送用輪船載往原籍等語並著廖壽豐妥籌辦理免滋擾害原摺片均著鈔給閱看將此諭令知之○己酉諭軍機大臣等有人奏英山縣知縣尹允照蒞任後積案至四百餘起兩造併押令伊戚尤心芷至押所索錢又東鄉賈姓自縊一案濫刑案臧古山劉姓因挖石誤傷行人押至年餘得銀釋放招彈唱女子入署任令倚官爲勢致釀命案請飭查辦等語著福潤按照所參各節確切查明據實具奏毋庸徇隱原片著鈔給閱看將此諭令知之○諭御史易俊奏各省遊幕太多或報捐官職營謀薦引薦者祇顧私情不問賢否若輩自潔者少一經收錄恣意妄爲流弊不可究詰等語近來各省仕途冗雜人浮於事往往輾轉營求差使無非意圖牟利奔競成風於吏治民生殊有關繫嗣後中外大小臣工各宜遠嫌鄉重破除情

而不得仍蹈賄徇故習致負朝廷澄敘官方至意○御史易俊奏抽盤一事雖屬不得已之舉而數十年來各省防營林立已爲籌餉大宗商民相安久忘擾累現值餉款孔亟之際與其從旁搜括爲若就此認真整頓尙可歲增鉅帑不至病民也各省情形不同大要不患來源之少而患侵蝕之多不患比較之不一而患勸懲之不實臣請謹爲我皇上陳之各省溢差定限一年期滿名爲調劑非有勞績不能得委其最優之溢差非勞績而兼有奧援者仍不能得委充斯差者大卡動獲萬金中卡或數千金小卡亦踰千金夫薪水能有幾何而此盈千累萬非作弊竇從何處得來固不待智者而知也其在稍知自愛之委員縱未必涓滴歸公尙能顧名思義若劣員則任意侵漁毫無忌憚司事有充司事之費巡丁有充巡丁之費試思司事巡丁有何銀賄賂委員乎亦不過取償於商民而已不知司事巡丁私取商民一二金則盤卡少收商民十餘金矣查部章有按年按卡切實比較以收數之盈絀定委員之功過如收數較多再令接辦其短收各員立予記過停委等語各省總局其始非不遵照辦理無如日久視爲具文責緣者雖多記過而不見撤差安分者雖多記功而不見留辦似此漫無賞罰人雖至愚孰不欲收多報少自飽饕餮乎委員徇於積習先私後公猶望盤金有起色也難矣擬請飭各省將軍督撫臣於盤金一切弊端認真釐剔並諭令戶部妥定章程咨行各直省以從前收數最鉅之年爲定額毋得藉詞減少其比較

數目委員姓名接辦年月按月報部以備稽查有一連兩季記過者卽行撤差不得徇情留辦有一連兩季記功者不獨留辦並准咨部獎給虛銜封典倘一連四季記功大卡長收至一萬兩以上中卡長收至五千兩以上小卡長收至二千兩以上者卽准分別酌保升階如此則貪得無厭者不能鑽營戀棧而潔清自好者尙得保獎酬勞庶人人勉力奉公儘收儘解比較之數自可逐漸加增第恐不肖委員既欲免過又圖肥己多方抑勒累及商民應由總局刊刻簡明告示徧行張貼如燈卡有額外需索故意留難情事准商民赴總局控告從嚴參處俾委員知所儆懼不敢違章罔利上有益於國計下無妨於民生矣

上諭御史易俊奏各省釐金積弊太多請飭妥定章程以杜中飽一摺著戶部議奏○癸丑新疆地震○命吳大澂開缺來京○諭爲政之要首在得人前諭中外臣工保薦人才業經次第擢用當茲時事多艱尤應遴拔真才精實幹濟著各部院堂官及各直省將軍督撫等於平日真知灼見器識閎通才猷卓越究心時務體用兼備者臚列事實專摺保奏其有奇才異能精於天文地輿算法格致製造諸學必試有明效不涉空談各舉專長俾資節取該大臣等當念以人事君之義一秉大公詳加考核倘或有冒濫謬探虛聲甚至援引私人瞻徇情面濫保之咎例有專條定惟原保之人是問○諭軍機大臣等有人奏疆臣貪婪耽縱據實糾參一摺據稱江蘇巡撫德馨利慾薰心宴樂成癖傳通內外消息以門丁吳子昌

爲首幕友朱姓助之元泰仁錢號經手過付屬員中則何其坦朱士林王書臣皆託心腹招搖納賄萬載  
縣知縣周鳳藻貪滑巧詐屢有控案以重金請託得免上饒縣知縣朱錫卿藉訟焚城該撫反濫行保薦  
去年冬間大作生日收受禮儀演戲月餘請飭查懲等語著張之洞按照所參各節秉公確查據實具奏  
毋稍徇隱原摺著鈔給閱看將此諭令知之○管廷獻奏開戶部以償款太鉅請飭大學士六部九卿  
及各直省將軍督撫通盤籌畫一摺已奉旨允准伏思戶部爲財賦總匯酌盈劑虛何至束手無策部  
臣既無辦法豈內外諸大臣果有辦法乎卽或有法亦不過曰加釐金也借商款也裁靡倖也加鹽課也  
開礦務也修鐵路也用鈔票也稅間架也推廣捐例也夫天地生財止有此數我朝歲入之款乾隆以  
前不過三千餘萬今則稅益加徵增至七千餘萬矣列祖列宗有鑒前明末造之失丁賦之制有減  
無增遵行已久罔敢踰越目今雖無加賦之名而隱有加賦之實稅釐之入何一非小民之脂膏乎上之  
所獲日以多下之所蓄日以少若再行一切瑣屑補苴之政巧爲陵削無論億萬鉅款爲數難盈恐閭閻  
貧窶衆志日離剝肉補疮病日益甚暫支目前後仍不繼歲復一歲爲患何窮然則居今日而理財不在  
開源也亦節流而已不必變法也亦法祖而已乾隆以前歲入不過三千餘萬康熙年間三藩之變糜  
爛至七八省用兵至八九年未聞用不足也雍正乾隆年間大兵大役亦所時有未聞用不足也此外營

免天下錢糧者六次普免天下漕米者四次以及各省稍有偏災無歲不緩徵無歲不豁免其爲數不知幾萬而部庫常有七八千萬之儲以昔之所出計今之所入每歲應贏餘五千餘萬而部臣猶以拮据爲慮不知此五千餘萬者果皆實用實銷爲必不可少之款乎抑隱微侵蝕而盡付諸不可知之數乎爲今之計宜飭戶部將現在歲支之款與乾隆以前歲支之款澈底清查認真比較昔有而今無者何款昔無而今有者何款同一款也減於昔者何事增於昔者何事逐款分晰出具案語彙造清冊呈覽其昔有而今無者不計矣其昔無而今有者概從裁撤卽今昔同有而其事徒爲具文無關實用者並可酌量暫行停止 皇上亦宜力求儉約所有 宮中用度一概規復舊制不使稍有增加伏讀乾隆四十六年九月丁卯 高宗純皇帝諭曰卽以內帑而論乾隆初年內務府大臣尙有奏撥部庫銀兩備用之事今則裁減浮費盤剔積弊不特無須奏撥且每歲將內務府庫銀令撥歸戶部者動以百萬計等語可見事無鉅細但能撙節務實自有明效大驗也以今之入款通盤籌畫使不得過乾隆以前歲出之數計每年可省銀四五十萬兩則二萬萬之賠款四五年卽可全濟全消之後每年常餘四五十萬則蠶金可裁而民困蘇矣廉俸可復而官累除矣捐納可停而流品清矣因以造船製礮整飭戎行何難 恩周宇中威加海外乎惟是歷來糜費半由中飽積習既深固結難除今欲驟加裁減必將曰兵多於前餉不可缺

局員薪水不可省也南北洋辦理海防購買船礮營建學堂葺塲暨機器製造等局之要需難緩也夫養兵期有用耳昔時兵少而戰必勝攻必取今時兵多而坐困於區區之局夷則無用之兵宜汰也各省局員久奉 諭旨裁撤各疆臣因循瞻顧迄未奉行上年山東巡撫李秉衡到任伊始即將局員裁撤殆盡每年可省五六十萬金東省如此豈他省不能照辦乎各疆臣之意不過以候補人員過多留爲調劑計耳伏查乾隆四十九年有准各省試用人員補期尙遠者呈明回籍俟到班時仍赴原省補用之例卽今大挑知縣尙有截留咨取之例若通飭各該員之補期尙遠無力當差者回籍候補於諸員亦無所損何必以有用之帑項資此無數之閒員乎購買之船礮全歸烏有不必論矣學堂葺塲久告成矣機器製造等局創建已二十餘年不知所製者何器所造者何物而應用船礮無一不購自外洋又何用此局爲也伏願 皇上赫然震怒全行裁撤如有掣肘而阻撓者便是 祖宗之罪人 國家之蠹賊立予嚴譴無少假借誠以當此鉅痛深之際正 宵旰臥薪嘗膽之時欲求有益於 國無害於民舍此之外更無別策果能猛力振作則 朝廷不得已之苦衷更無難布昭於天下倘仍一味因循苟且補苴無論鉅款難盈而所有之財上不在 國下不在民而全歸中飽之蠹卽歲入再加數倍稍有濟乎臣亦知積弊既深盤剝非易然際此時事艱難非改絃更張實無以收振弱起衰之效且率由舊章更覺有利無弊是以

不揣冒昧披瀝直陳 上諭御史管廷獻奏請節糜費以裕帑儲一摺著戶部妥議具奏○乙卯 上御  
文華殿日本國使臣林董觀見○調德壽爲湖南巡撫以嵩崑爲貴州巡撫○李鴻章電致總理各國事  
務衙門劉含芳元電今晚接文登何令金齡彭令王永十二日稟稱日本兵在旅順染痘疫急於到威委  
員辰男十一日已派弁於威海城外標記民房今早往各村莊標記卑職等執條約與之力爭不能挽回  
不得已卽代譯刷字以及一切空房備日兵前來暫住伊嫌空曠器用俱無依然標記民房勢不可遏卑  
職等無可如何祇好勸慰百姓令其忍讓一面催日本委員趕修兵房以便速行移動免其久擾居民民  
間穀苗初長已與面商禁止人馬踐踏伊已應允土匪猖獗急於捕治但恐兵役執械日兵未免生疑卑  
職等與該委員面商亦已應允且願協緝卑職等於十二日已時見辰男午後進劉公島見其水師統領  
商辦一切據理直爭伊亦不能固執已見惟住民房一事卑職等才力短淺實難挽回理合據實馳稟再  
頃辰男來云草廟營兵何以不遵條約遷徙該員明日必欲親自前往與其理論並約同行云云卑職等  
以同去無益答以俟界限劃清必如約辦該員遇事恃強言出不由稍駁若不趁早綢繆將來大隊到此  
必釀事端以其地圖核計上莊鄆館均在遷徙之內務望速賜酌奪等語查原約海灣沿岸日本五里計  
核中國四十里草廟以威城計則在四十中里外以海灣算則在內昨交飛鯨帶呈稟圖乃威城四十里

外又添海灣四十里彼此界地更非原約所有應請速電總署與林大臣商定電屬該員一切如約山芳派輪送交爲妥今日旅順來船傳言瘟疫是實或今暫住廟宇空房一面由其速盡兵房再行移住之處伏候電諭飭遵云鴻已鈔致伊藤電轉電劉道該國武員多恃強生事馬關和約實由武員力持不讓此事未知伊藤能力阻否草廟現有東軍防營實在海灣四十里以內原約只有海灣無威海城字樣恐東撫偏執不肯遷移必滋口舌祈奏明飭其照約辦理爲要奏入軍機大臣奉 旨李鴻章電奏接劉含芳電稱日本委員辰男以草廟營兵何以不遵條約遷徙來問經文海縣何金齡等稟請趁早綢繆等語馬關另約第二款在威海衛應將劉公島及威海衛口灣沿岸照日本國里法五里以內地方約合中國四十里以內爲日本國軍隊駐守之區現在草廟防營係在海灣四十里以內自應照約遷徙著李秉衡即將防營擇地遷徙免滋口舌○內辰李鴻章電致總理各國事務衙門頃電劉含芳元電所稱劃界一節不其明晰如草廟以威海計在四十里外以海灣算則在內查原約只有威海口灣沿岸四十里以內爲日本軍隊駐守並無由威海起算之說草廟距海灣南岸僅三十里原駐防軍若不遷移顯係違約必啟衅端至稟呈日員劃界圖於距威四十里外又圈四十里據稱日兵不能越境華兵亦不能越是於中間留爲甌脫之地彼此免生嫌衅但原約並無四十里外又劃出甌脫若干里斷不能再圈至四十里之多今惟



先將海灣四十里內所駐東營移出另紮兌其藉口生事再徐議賊脫應留若干里約明兩國兵均不能過界是在該員與委員等相機商辦隨時報聞云又急電稱劉舍芳寒電今日已初彭令乘先鋒輪船回煙臺據日本委員辰男照會本官擬於泊口地方擇定營房於日曆七月初四日即乙未閏月十三日派遣陸軍中衛帶兵十名前往該地過貴國東字營兵二十餘名云奉上官命駐紮又據該村民百草廟尙有兵二三百名本官查和約第二條田劉公島及威海衛灣沿一帶起日本里五里卽貴國四十里以內爲日本軍隊駐紮區域今此域內貴國兵駐紮實與條約不合請查照咨退卽速見覆等因卑職等當函告孫統領據稱無撫院行知不能移營奉統領並面告專差屬轉告王彭委員等以後如日兵到泊口定開鎗轟擊等語事關重大卑職等公同商議暫未能覆祇得承謨乘先鋒輪船回煙請示刻下鄉民已有驚避老幼哀哭於道路之狀合併稟明等語職道查彭令呈閱日本水峻辰男照會與所稟各節相同應如何飛電東軍統領孫萬林遵照之處伏候電諭飭遵云聞東撫前有嚴札沿海各營如未奉該撫札諭擅自移紮卽以軍法從事孫萬林紮營實在海灣南岸四十里以內若不移紮必開衅端務望速電飭遵勿遲談生事總理各國事務衙門以聞待 旨李鴻章兩電均悉本日已諭知李秉衡東軍駐紮處所如在海灣南岸四十里以內卽應照約嚴飭防營毋得輕動免啟衅端至賊脫之說本爲原約所無不可因

彼現查之圖勉強遷就轉生枝節○戊午諭軍機大臣等李秉衡電悉日兵暫駐威海我軍防營駐紮處所總以海灣南岸四十里爲斷如在四十里以內務當照約一律遷移免致被族藉口著李秉衡查明里數妥爲商辦嚴飭孫萬林等毋得孟浪開鎗縱擊輕啟衅端是爲至要至日兵強佔民房一節昨已由總署照會林使並由李鴻章電問伊藤令其照約辦理矣○己未諭軍機大臣等李秉衡電已悉本日李鴻章電已接伊藤覆電云轉達兵部諭知軍隊司令官展緩赴威俟該處兵房起蓋完竣方行等語日兵既展緩赴威強佔民房之說自可無慮著李秉衡將四十里內外確數查明防營駐紮之處飭令孫萬林照約辦理該撫請仍駐萊州俟定局再行回省著照所請行○庚申諭敬信等奏遵保辦理團防出力員弁開單呈覽一摺著該部議奏○諭前據宗人府刑部會奏宗室錫鈞呈告御史鍾德祥家丁熊翼臣等訛詐銀兩牽涉本官當派徐桐剛毅會同審訊茲據訊明具奏鍾德祥雖無訛詐銀兩情事惟於錫鈞之賄求免參該御史收受賄私訊據熊翼臣等供詞業已衆證確鑿乃猶希圖狡卸捏稱郭松亭等赴津情弊顯然亟應確切根究以期水落石出鍾德祥著先行革職歸案審辦○癸亥諭吳大澂奏特參造言生事挾制統領之營官哨長請旨懲儆一摺翼捷營營官副將周吉斌哨長游擊朱正霖於該營裁撤時輒敢捏造謠言煽惑勇丁至鄭連泰寓所滋鬧實屬漫無法紀周吉斌朱正霖均著卽行革職并不准投効他

警以儆刁玩而肅紀律○總理各國事務衙門奏臣衙門查咸豐八年英約第五十一款內載嗣後各式公文無論京外不得提書夷字早經通行在案各國事同一律現據日本使臣林董函稱近聞京報摺內指稱島夷速請更正請旨飭禁等語臣等以中外既敦睦誼文字之間理宜慎重英約通行已久豈可視為具文相應請旨飭下京外各衙門嗣後一切公文仍不得提書夷字以符成約恭候命下臣等欽遵通行各衙門一體照辦得旨如所議行○甲子諭軍機大臣等有人奏松江城內火藥局庫請擇地移建一摺據稱江蘇松江府城內建設火藥局庫炸彈無不充牣庫房逐漸增加為各路防營軍火總庫距衙署民居均在百步以內居民不無慄慄危懼且萬一稍有疏虞則全省軍火立形支絀請飭擇地妥為移建等語火藥為操防要需儲藏最宜慎重據奏各情所關非淺著張之洞奎俊派員相度地勢會同紳董將城內火藥局庫如何移置之處妥籌辦理將此諭令知之○諭御史聯錦奏劣員把持勒索請飭查辦一摺據稱理藩院司員通同書吏於圖什茨圖親王等報効承襲各案取巧營私廢公索賄請飭查等語著理藩院堂官按照所參各節確切查明據實具奏○丙寅諭給事中褚成博奏各直省船械機器等局請飭各督撫招商勸辦以開利源等語著戶部議奏○丁卯諭軍機大臣等自來求治之道必當因時制宜制況當國事艱難尤應上下一心圖自強而弭禍患朕宵旰憂勤懋前愆後惟以圖除積習力

行實政爲先疊據中外臣工條陳時務詳加披覽採擇施行如修鐵路鑄鈔幣造機器開各礦折南漕減兵額制郵政練陸軍整海軍立學堂大約以籌餉練兵爲急務以恤商惠工爲本源此應及時舉辦至整頓釐金嚴核關稅稽察荒田汰除冗員各節但能破除情面實力講求必於國計民生兩有裨益著各省將軍督撫將以上各條各就本省情形與藩臬兩司暨各地方官悉心妥籌酌度辦法限文到一月內分晰覆奏當此剝鉅痛深之日正我君臣臥薪嘗膽之時各將軍督撫受恩深重具有天良諒不至畏難苟安空言塞責原摺片均著鈔給閱看將此由四百里各諭令知之○己巳准廣西巡撫張聯桂開缺回籍○是月日本國新簡駐華使臣林董抵任

六月辛未以史念祖爲廣西巡撫○壬申調岑毓英爲雲南布政使以唐樹森爲貴州布政使邵積誠爲貴州按察使○癸酉曹志清奏直隸省差徭之繁重甲於天下常年雜差民力已苦不支去歲兵差絡繹州縣橫斂暴徵而民愈不堪命矣在朝廷勦衆興師原屬萬不得已之舉卽借資民力小民等情殷報効亦所樂從無如不肖州縣藉差爲肥私之計胥役視差爲致富之奇敲骨吸髓毫無顧忌勒派之法不一有按牛馬捐者有按牌戶捐者有按村莊捐者明以要車爲名其實全行折價一馬一牛折錢百串及數十串不等下至一驢亦折十數串一牌一戶捐錢數十串及七八串不等甚至無衣無褐之戶亦捐錢

一兩串其按村莊捐者過三百戶爲大村捐錢二千串及一千串三百戶以下爲小村捐錢七八百串及五六百串甚至數十戶之村亦捐錢至二三百串合計大縣可捐數十萬串中縣小縣亦不下十數萬串驛路經行之處極可言也甚至鄰近州縣亦藉幫差爲名依樣勒派殊符一標差役四出虎噬狼貪慘難言狀少不遂意立加拘比捐時本以買備車馬爲名其實盡以分肥及至兵差過境仍向有車馬之戶勒僱名發官價而層層剝蝕車戶所得無幾點者照役得免懦者久供差役必至車敝馬斃而後已尤可駭者去秋水災哀鴻遍野皇上軫念民依撥款賑濟乃聞潞州樂亭各州縣將賑銀扣抵兵差聲言不足仍向民間苛派災黎謀食維艱又加此累多至轉於溝壑無所控告是民非困於災直困於貪吏之苛斂也查山東巡撫李秉衡懲辦蠹役藉差擾民一案遠近稱頌何以畿輔重地民間受累如此未聞少加懲辦耶請明降 諭旨嚴申厲禁以儆效尤並 飭督臣王文韶密查使扣勒派各州縣從嚴參辦庶貪汚稍知斂跡而民困日蘇矣伏思州縣之敢於勒派實由直隸之辦差向無一定章程故弊端百出查原任大學士閻敬銘有議減川陝山西河南差徭章程既不累官亦不病民請 飭督臣查照辦理未始非整頓吏治之端也 上諭御史曹志清奏直隸州縣藉差勒派請飭查禁等語州縣差徭借資民力原應安定章程免致閭閻被累若如該御史所奏勒派強派官吏層層剝扣任意魚肉潞州樂亭等處並將賑銀

扣抵兵差擾累情形殊堪痛恨著王文韶查明侵賑勒派各州縣從嚴參辦毋稍姑容並議定差徭章程以杜弊端而蘇民困○曹志清奏直隸盜賊充斥日甚一日搶劫之案層見迭出畿輔萬方輻輳行旅皆有戒心從前輜重多者每至被劫近則一肩行李亦多不免從前搶劫多在晝夜近則白晝肆行強暴早路則騎馬持械倏忽往來水路則沿船搜賊冒充官役順天保定天津河間等屬所在皆有而莫甚於深冀兩州盜賊同夥百十人或四五十人或二三十人公行搶劫毫無顧忌倘不得財物則擄掠人口以去女則價賣男則鬻禁勒贖如無人贖卽行殺害一經報官非置之不理卽反向事主誅求間有批准飭緝之案亦止奉行故事被害之人怕受官司之累往往不行呈報以致賊匪視劫奪爲固然藐王法若無有大抵盜賊恃捕役爲護符捕役卽以聚賊爲生路而不肖牧令又多以諱盜爲規避處分之計不以捕盜爲事反恐治盜於己不利故盜賊朋行搶劫而莫敢誰何現在饑民遍野游勇成羣不加懲治必至日聚日多養成巨患相應請 旨飭下督臣嚴飭各府州縣認真緝捕勿託空文以圖塞責勿縱捕役聚賊自利倘有怠玩不職之員立行參辦庶盜風日戢而閭閻安堵矣 上諭御史曹志清奏直隸盜賊充斥請飭認真緝捕等語州縣諱盜處分甚嚴若如該御史所奏順天天津河間等處搶劫之案層見迭出深冀兩州各屬聚盜尤多甚至擄掠人口價賣勒贖一經稟報該州縣規避處分反向事主誅求間有准緝之

案亦止奉行故事似此規避處分必致養癰貽患著王文韶嚴飭各府州縣認真緝捕勿得徒託空文縱令捕役養賊圖利倘有怠玩不職之員立行參辦務期盜風日戢閭閻安堵用副除暴安良至意○甲戌准兵部尚書孫毓汶開缺調理○乙亥諭軍機大臣等戶部奏請銷孔股議陳辦理情形一摺覽奏均悉現因價款過鉅應借洋款每年籌還本息約須一千五六百萬各路防軍未能盡撤需餉亦繁亟須預爲籌備該部所擬考核錢糧整頓釐金皆屬切實可行著各直省將軍督撫查照該部所擬認真妥辦據實具奏又裁改兵制一條擬令各省挑留精壯三成其餘老弱一概裁撤著該督撫各就地方情形悉心妥籌以資裁汰奏明請旨辦理該將軍督撫皆身受國恩務當體念時艱共矢公忠力圖補救不得瞻徇遷就畏難苟安僅以一奏塞責是爲至要該部另單所陳各條除停放米折一項本日已有旨令八旗都統議奏如鹽斤加價裁減局員薪費重抽煙酒稅釐各條並著該督撫一體實力舉行以期有裨急需原摺單均著鈔給閱看將此諭知戶部並由四百里各諭令知之○恩澤奏吉林地處邊隅倚山瀕海夙爲通逃淵藪二十年來重法懲治之盜犯數以千計而劫掠仍不稍戢推求其故蓋因齊魯之莠民航海而來者每年不下數萬直北之教匪餘黨潛蹤蒙古都者實繁有徒通名之曰跑驢不能服苦未耨得同卽嘯聚搶劫狼奔豕突飄忽靡定此輩彼竄終未淨絕根株奴才蒞任後留心檢查各屬詳報盜案逃劫道路

入室搜搶者不過十之五而網人勒贖之案反居其半夫道路巡劫入室搜搶止於現有之財貨苟非事主喊捕尙不致戕害身命若網人勒贖者不論在家在途有無貨財只聞其家開鋪戶或小有田產之父子姪或商賈之夥友工人擇其可挾者網縛以去聲言在某山以待限時備贖或器械往贖過時不贖以及囑官報捕者卽將其人殺害以故被事之家畏其加害不敢喊捕但求被捉之生還計家資之輕重核其別暴情狀實有過於響馬強盜而慘酷更甚於廣東廣西捉贖者考之定例非將十五歲以下幼童並被捉數在三人以上擄捉已至三次更拒殺兵役並被捉之人因病及傷身死或謀故毆殺者均不在斬首之例奴才愚以爲安良必先除暴水懦不如火烈擬請嗣後吉林省鄉人勒贖匪犯不論被捉人數有無凌虐致傷身死及賊之多寡但已行者不分首從均照響馬強盜例擬斬立決爲示仍照本省章程於審明後詳由奴才駁明批以就地正法年終摘山某案奏報仍俟數年後此風稍息再行奏明改歸舊例辦理以挽澆風而保善良下刑部議奏○丁丑諭軍機大臣等有人奏山東賊匪擾及直境請飭會剿一摺據稱山東海豐縣五營小山地方爲盜藪匪聚五六十人各有快馬洋鎗白蠟馳騁毫無忌捕役劉紹庭卽係巨窩知縣靡存從而庇護該匪擾及直隸之鹽山鎗傷事主身死該縣調營往捕竟敢聚眾抗拒僅獲三犯餘皆逃遁等語著王文韶李秉衡遴派幹員馳赴該處嚴密訪查如果有前項情事



卽行派調營勇迅速兜拿毋任漏網並著李秉衡查明庇匪之知縣從嚴參辦原摺著鈔給閱看將此各諭令知之○己卯以徐卮爲兵部尙書許應駟爲左都御史○調廖壽恆爲倉場侍郎汪鳴鑾爲吏部右侍郎兼署刑部右侍郎以許景澄爲工部左侍郎○庚辰福建古田縣民人殺英國教士多名中英交涉起○諭徐桐等奏審明風憲官收受贓款按律定擬一摺已革御史鍾德祥身居言路宜如何砥礪名節乃竟收受贓款實屬有玷查規著照所擬發往軍臺効力贖罪○癸未予故原任新疆巡撫劉錦棠於湖南省城及湘鄉縣原籍建祠○諭鹿傳霖奏請調員差遣等語禮部主事曹祥開缺河南開歸陳許道勒捷昌前四川松潘鎮總兵夏毓秀著禮部兵部山東巡撫分別飭令各該員迅速前往四川交鹿傳霖差遣委用陝甘補用總兵葉占魁現在陝西軍營著俟軍務肅清再赴四川聽候差遣○甲申譚鍾麟馬丕瑤奏臣丕瑤前奉 諭旨飭查事件內有文武官員四成報効一案檢核檔案知此項經費始於光緒十年每年繳銀三十萬元卽省城賭館之陋規也 臣鍾麟前在閩督任內習聞廣東賭風之盛甲於天下而盜劫之案亦較他省爲尤多抵粵受箠以來當與 臣丕瑤督同司道府縣切實籌議欲以爲縱民爲賭實縱民爲盜欲止盜非先禁賭不可欲禁賭非裁四成陋規不可謹詳察情形熟權利害爲我 皇上鑒晰陳之查廣東賭博名目實繁除園姓一項奏明弛禁現值甯嗣孔股毋庸另議外下此有白鴿票花會等

項而其尤甚者惟番攤館徧於國中村墟城市僻巷窮鄉館所林立均以此爲謀衣食之大宗幾於無地  
不賭無人不賭從前未收四成之費地方官尙可拘拿自經收繳以後明目張膽毫無顧忌潮查文武衙  
門久受賭規沿爲出息若一議禁衆嫌不便因於所收規項提出四成化私爲公美其名曰經費又曰報  
効適有籌造兵輪鎗礮之用遂於奏報製造摺內附案聲明實未敢以陋規上瀆 天聽也十年來賭勢  
日張因賭搶劫致斃人命之案不一而足而賭館開設如常民間咸謂案經奏定地方官莫可如何夫賭  
賤業也亦利藪也游手好閒之輩日夜腐聚百十成羣小民終歲勤動不足以資事畜有此僥倖無源之  
利人爭趨之爭之不已必至於鬪鬪之不已遂至於殺死而不厭民命何堪遭此荼毒其害一士農工商  
各有正業自賭館盛行無業者以賭爲業有業者改業爲賭父兄宗族不可禁遏甚至室家離散骨肉傷  
殘風俗人心由此大壞其害二官收賭規本干厲禁而營中武弁可藉緝捕無費爲詞然先徇私相授受  
不敢舉以告人也今則視爲固有之常且取爲應酬之具紀綱法度蕩然無存其害三或謂開賭所以弭  
盜近年賭風極盛而盜案較之往昔有增無減抑且獲盜訊供多有在賭館會集分贓者是窩賭實足以  
窩盜以盜止盜盜不可窮以盜緝盜盜不可止其害四種種爲害而因其三十萬元之利遂使風俗吏治  
日壞一日所得不償所失實爲廣東一大弊政若不嚴行封禁此風伊於胡底 臣等督同司道府縣悉心

酌核當此時艱孔艱民俗凋殘卽使用款難籌亦何堪以呼盧喝雉之錢爲理財籌餉之計量入爲出酌  
取刑虛與其取不義之財而大虧政體何如減無用之費而稍挽頽風現已札行藩臬二司督飭廣州府  
將所屬之縣賭館一律嚴行查禁所收四成報効一項自本年五月爲始卽行一律革除一面出示曉諭  
免其收繳經費使之無所藉口而防務要需亦未便虛懸無著查近年粵省用款浮亂過多亟宜竭力撙  
節經飭司局綜覈名實權衡緩急速將冗濫各款大加裁汰約計每歲可節省銀二十餘萬兩以之撥抵  
四成經費三十萬元已屬有盈無絀庶幾利無所損而害已悉除良善又安匪徒知儆於地方吏治民生  
均有裨益報聞○乙酉命徐用儀退出軍機處並毋庸在總理各國事務衙門行走○命翁同龢李鴻藻  
在總理各國事務衙門行走○命禮部左侍郎錢應溥在軍機大臣上行走○以禮部尙書崑岡協辦大  
學士○授麟祥爲大學士管理工部事務○設鎮麟奏粵省添修礮臺礮棚藥庫兵房等工自光緒十九  
年起至二十年止陸續動用銀八萬二千餘兩請 飭部立案下所司知之○戊子諭自泰西各國通商  
以來洋人僑居內地中外相安朝廷一視同仁迭諭疆臣時加保護乃近日四川省城有焚燬教堂之案  
同時煽動蔓延數州縣頃又據福建報稱古田縣匪徒殺傷洋人多名甚至戕及婦孺兇暴情形殊堪痛  
恨四川案已獲犯訊解福建一案首要各犯尙在緝拿著慶裕邊寶泉督飭營縣速卽拿獲毋任漏網此

等不逞之徒造言惑眾所在多有是在地方官隨時防範消患未萌何得玩泄因循以致釀成巨案著各直省將軍督撫等通飭所屬凡有教堂處所務須實力保護並勸諭居民勿得煽言妄生疑忌倘敢藉端滋事定當執法嚴辦該地方官辦理乖方亦當從重懲處略不寬貸將此通諭知之○己丑 上諭 慈福端佑康頤昭豫莊誠壽恭欽獻崇熙皇太后前請安○庚寅調熙敬爲吏部尚書敬信爲戶部尚書以榮祿爲兵部尚書○諭前因給事中稽成傳奏請招商承買各省船械機器等局當經諭令戶部議奏茲據奏稱中國製造機器等局不下八九處歷年耗費不貲一旦用兵仍須向外洋採購軍火平日工作不勸所製不精已可概見福建船廠歲需銀六十萬緡甲兵艦仍未能自製湖北鉛礮鍊鐵各局廠經營數載糜帑已多未見明效如能仿照西例改歸商辦弊少利多等語製造船械實爲自強要圖中國原有局廠經營累歲所費不貲辦理並無大效亟應從速變計招商承辦方不致有名無實南洋各島暨新舊金山等處中國富商在彼僑居者甚衆勸令集股必多樂從若遇寶泉譚鍾麟馬丕瑤遴派廉幹妥實之員迅赴各該處宣布朝廷意旨勸諭首事紳董等設法招徠該商人如果情願承辦或將舊有局廠令其納贖認充或於官廠之外另集股本擇地建廠一切仿照西例商細其事官爲保護若商力稍有不足亦可借官款維持其辦理章程應如何斟酌盡善以杜流弊之處卽著該督撫等悉心妥籌詳晰具奏○乙未

上御乾清宮受賀○劉坤一奏 欽奉電 旨劉坤一電稱牛師韓請添招馬步十三營等語現在河

狄回氛正肆若待添募多營必至耽延貽誤且新募之勇亦難得力著嚴飭該總兵懷遵前旨卽統所部七營迅速起程毋許逗遛欽此當經欽遵嚴飭該總兵遵照去後茲據稟稱所部僅止七營兵力實覺單薄記名提督李永芳所統豫靖軍六營現已撤回原省該軍經李永芳訓練數月較新募之勇大不相同可否奏請抽撥三營帶往又甘省民貧地瘠糧價異常昂貴豫軍營勇每月每名餉銀三兩六錢萬不敷用應改照湘軍章程每正勇一名月給口糧銀四兩二錢其餘一切營制餉章概照湘軍辦理至各營軍裝旗幟及礮位藥彈重笨等件自應另行轉運其帳房鑼鼓及一應隨營需用什物擬卽將此間所置車駝馬匹隨帶沿途應用所需喂養及應領月餉均由豫省按月提前撥解等情稟請具奏前來 臣查牛師韓一軍兵力誠屬太單惟接河南撫臣劉樹堂電稱該省餉項拮据異常牛鎮現有豫凱七營當經接濟所請添撥豫靖三營應毋庸議至留甘駐防多係湘軍該豫軍營制餉章未免相形見絀自應改歸一律該軍所置車駝馬匹本擬飭令按照三成繳價今既派赴甘省應請毋庸變賣俾沿途藉資轉運以利進行所需喂養等銀應仍照章發給以上各節合無仰懇 天恩俯如所請 勅下河南撫臣查照辦理以資飽騰於援剿之師不無裨益至應需鎗礮器械除將繳回之壞鎗馬梯泥等鎗仍行配齊藥彈發給並

另由宋朝儒行營內撥給八生特鋼礮兩尊神機礮四尊再飭赴天津軍械局請領兩磅過山礮八尊藉資攻剿所部馬步隊伍卽飭剋日分起開拔不得稍涉逗遛以慰宸廑得旨如所請行○丙申沒麟書爲文淵閣大學士○丁酉上詣大高殿壽皇殿行禮

秋七月己亥朔時享太廟上親詣行禮○庚子予貴州鎮遠府故布政使銜貴東道吳自發祠列入鎮遠府祀典○譚繼洵奏湖北鍾祥等州縣以漢水驟漲河堤漫潰田廬人口多有損傷已飭委員馳往查勘籌款撫卹得旨知道了並著飭屬查勘妥爲撫卹毋任失所○張之洞奏江南交涉事務最爲殷繁營務籌防亦難懈弛兼營分應在在需才查有分省補用知府錢恂學精才敏洋務博通尤能研究中外商務歷經出使德國大臣許景澄出使英國大臣龔照璣調充參贊既經電商龔照璣咨調回華又查有湖北候補知府朱滋澤才長識練久在軍營熟習戎機前於春間海防喫緊之際因江南文員中罕有知兵之員電商兼護湖廣督臣譚繼洵咨調來江委令管理練兵事宜又查有浙江候補知府劉祖桂機敏廉謹不染習氣臣創辦銀元鐵政織布紡紗繅絲各局皆係西法製造要工鉅款尤須廉幹之員考核經理方有實效又查有浙江候補知府聯豫明幹精詳究心洋務前隨出使英國大臣薛福成出洋充當隨員曾赴比國鐵廠講求煉鐵工作事務以上各員皆爲洋務防務有用之才合無仰懇天恩俯准

將錢恂朱滋澤劉祖桂聯豫四員准臣調來江南差委以資臂助實於時局大有裨益得旨著張之洞咨行各該省調赴江南差委○辛丑諭德馨奏知縣擅自離省請旨革職等語江西贛縣知縣鄧季春經德馨以難勝繁劇另行請補廣昌縣知縣乃該員於贛縣開缺後擅自離省實屬謬妄廣昌縣知縣鄧季春著卽行革職以肅官常○增祺奏振豐樹根城副都統博棟阿咨稱光緒十九年前任將軍依克唐阿以墨爾根附近設立鎮邊軍四營如有軍情不能迅速相通因在該城設立報房一所其電學生應領薪水銀兩由該處籌給刻因無項續發咨請作正開銷等情前來查該城設立報房實因信息靈通起見現值多事之時電報尤爲緊要所有學生薪公等項每月領需銀二十九兩尙屬無多當經知照督辦電報事宜直隸津海關道盛宣懷核撥數目相符擬請仍照光緒十六年奏准彙納黑三局經費成案自本年二月初一日起由煙脂項下開支以資辦公而期經久下部知之○壬寅諭前因御史敬佑奏山東平原縣知縣王之幹知酷貪暴列款糾參當經諭令李秉衡確查茲據查明復奏王之幹於辦團尙非有心遲延亦無任用劣監浮收糧米情事惟於地方詞訟違例科罰信任丁差隨處訛詐民間細故任意資押實屬玩視民瘼王之幹著卽行革職○丙午庫倫辦事大臣安德因病乞休允之○諭軍機大臣等有人奏貪官營私牟利病民害商請旨查辦一摺據稱山西河東監掣同知張貽琯在河東置買鹽哇加價勒運

把持河南鹽務縱令家丁溫姓姚姓等冒名承辦鳳臺等縣鹽商復奪辦長子縣鹽務激各商歇業眾民  
怨嗟等語著張照按照所參各節確切查明據實具奏毋稍徇隱原摺著鈔給閱看將此諭令知之○諭  
軍機大臣等有人奏廣東候選道劉學洵行止卑劣性質狡猾倫紀有乖士林不齒自接充闡姓廩商交  
通官府倚勢陵人創開劉園並蓋造戲院將附近小戶逼令遷徙又藉施醫爲名在黃沙地方設堂驅逐  
居民陰圖侵地其經手闖姓侵吞捐項私抽經費並有藉端生事魚肉鄉愚各情馬丕瑤到任經辦人陶  
繼昌等呈控有案該紳黨與衆多串通隱飾請飭究辦等語所奏如果屬實必應從嚴參辦著譚鍾麟馬  
丕瑤按照所參各節確切查明據實具奏毋稍徇隱原片著鈔給閱看將此諭令知之○丁未 上諭  
建福宮 孝貞顯皇后聖容前行禮○命李鴻章入閣辦事調王文韶爲直隸總督兼充辦理通商事務  
北洋大臣○賞桂斌副都統銜作爲庫倫罕印辦事大臣○己酉福建廣東地震○諭李秉衡奏黃流秋  
汛盛漲齊東兩縣大堤漫溢成口請將在事各員議處一摺本年山東黃河伏汛未消水勢驟漲大  
月二十日下游齊東縣北趙家大堤因值風雨交加搶護不及致堤身刷塌數十丈由青城南趨在事員  
弁官屬疏於防範候補道丁達意參將劉福寶游擊李金壽知縣湯宗幹典史潘名彥均著交部議處其  
上游壽張縣高家大廟堤身亦於二十二日坍塌數丈水由安山一帶仍入黃河中游候補道李濟和既



經到工仍著交部議處李秉衡督率無方著一併交部議處該撫務營督飭在工各員加意防護仍確查高家大廟漫水是否未向南趨並將北道家漫口盤築裹頭免致續塌餘著照所議辦理另片奏委員以料未能核實等語候補同知邵守正候補巡檢崇實均著卽行革職以示懲儆○庚戌以陳混爲江西布政使○予故廣東陸路提督唐仁廉祭葬戰功事蹟交國史館立傳○諭據給事中張嘉祿奏浙省盜風甚熾並奏參提督張其光等當經諭令廖壽豐確查茲據奏稱浙江台州土匪上年經防軍兜剿匪首竄匿鄰境致寧波府屬之奉化縣時有劫奪案件迭經嚴飭文武各員分別緝拿惟匪首尤田雖尚未弋獲著廖壽豐飭屬勒限嚴緝該地方官倘有諱飾情事卽行從嚴參辦提督張其光查無廢弛之處總兵費金組知府馮相華並無嗜好著免其置議玉環營參將鄧鳳保查有在營納妾情事著撤去輪船督帶開缺以守備降補縣丞吳元昇年輕尙氣不知遠嫌著卽行革職勒令回籍○鹿傳霖奏川省盜風頗熾防軍現有二十餘營大半驕惰廢弛難期得力亟應認真整飭以肅營伍而靖地方查各省皆設立營務處以便隨時督率稽查有所警惕查兩司有籌餉拮据之責卽以之派充營務處庶責任專而統攝易除札委布政使王毓藻按察使文光會辦川省營務處事宜隨時稟商臣認真整飭外僅附片具陳報聞○辛亥以吳承璐爲江蘇按察使○李鴻章等奏光緒二十年九月三十日奉 上諭黎榮翰奏宋臣呂大臨

請從祀 文廟一摺著禮部議奏欽此欽遵到部臣等伏讀乾隆四十六年三月十八日 上諭從祀宮  
牆非人品學問醇粹無疵久經論定者孰敢輕議等因欽此又咸豐十年禮部會同大學士軍機大臣等  
遵 旨議定嗣後從祀 文廟應以闡明聖學傳授道統爲斷又同治二年禮部奏准附鑒 廟廷祀典  
至鉅應請 飭下各省督撫學政恪遵咸豐十年定章如爲 文廟中必應從祀之先賢先儒方准該  
督撫會同學政詳加考核奏明請 旨並將其人生平著述事蹟送部查核其 欽定書籍中引用若干  
條論贊若干條先儒書籍中引用若干條論贊若干條一併詳細造冊均請 飭下大學士九卿國子監  
會同禮部議奏各等因在案今據原奏內稱程門四先生游氏酢楊氏時謝氏良佐三儒先後均邀從祀  
惟呂氏大臨祀典尙闕臣伏考宋呂大臨字與叔陝西藍田縣人始受業於張載後受業於程頤與游酢  
楊時謝良佐同學史稱爲程門四先生程伊川謂與叔守橫渠學甚固又曰其兄和叔任道擔當風力甚  
勁然深潛縝密有不逮於與叔又曰與叔燕居頗嘗寢之必見其儼然危坐可謂敦篤矣元祐時由太學  
博士遷秘書省正字范祖禹薦其修身好學行如古人可備勸講宮弼致政後好釋典呂大臨致書曰古  
者三公內則論道於朝外則立教於鄉豈以爵位進退爲之變哉富弼深謝焉朱子論定先賢嘗謂呂與  
叔是箇剛底氣質涵養得到其禮學甚精中庸大學尤所致意因取其禮傳刻於臨漳學宮又查藍田縣

志呂氏父賢生六子皆賢和叔進伯與叔尤錚錚者也一家父子兄弟夫夫婦婦太和元氣真唐虞三代而秦俗之化與有力焉所更難者兄弟三人同德一心以修身行己爲先務則其所自得深矣與叔著有易經章句大易圖象易傳芸閣禮記傳註編禮論語中解孟子講義各書今其書雖散軼不全然易傳朱子門人採入童溪易說中十之二三圖象列於成德堂經解中禮記傳註元儒陳澧採入禮記集說中十之六七且我朝欽定三禮義疏錄其說二百八十餘條編禮則大學士臣李光地多參考其義禮傳則前禮部尙書臣蔡惠田輯五禮通考亦採其說等語並據繕錄呂氏禮說四卷送部勘正前來臣等覆攷宋史呂大臨傳稱其學於程頤與謝良佐游酢楊時在程門號四先生通六經尤邃於禮每欲振習三代遺文舊制令可行不爲空言以拂世駭俗詳載其論選舉書及規箴彌學佛書元祐中爲太學博士遷秘書省正字范祖禹薦其好學修身如古人可備勸請未及用而卒又呂大防傳內稱與弟大臨同居相切磋論道攷禮冠喪婚祭一本於古關中言禮學者推呂氏又附見程頤傳門人內又御纂朱子全書言呂與叔論選舉狀之論甚高使其不死必有可用又言游酢謝諸公當時已與其師不相似與叔年四十七他如文字大綱立得腳健說得好又切又言呂與叔文集煞寶說得好處如千兵萬馬飽滿仇壯又程伊川集載與大臨論中書數百言辨析毫芒又呂氏雜志言呂與叔以門廕入官不

應舉或問其故曰不敢掩祖宗之德又李士英宗名臣言行錄言程子呂大臨深潛縝密資質好又能涵養惜不壽某只與叔之年亦不見得到此田地又明馮從吾關學編張子而下卽推大臨又孫奇逢理學宗傳言大臨深純近道聞張子誠仁之旨豁如也又黃宗羲宋儒學案言朱子於程門中最取大臨再攷大臨所著書雖多佚然 欽定四庫全書提要載中庸輯略宋石齋編朱子刪定斷自周子二程子張子而益以呂大臨謝良佐游酢楊時等說又論孟精義朱子撰取二程子范祖禹呂希哲呂大臨謝良佐游酢楊時等說兩書均見朱子遺著內又 欽頒學宮之朱子四書集註皆引大臨說甚多又 御纂性理精義亦多採大臨說又 欽定禮記義疏引用大臨說二百數十條又其全篇目若宋史藝文志有呂大臨易章句一卷大學義一卷中庸義一卷禮記傳十六卷程頤呂大臨游酢楊時四先生中庸解義一卷論語解十卷家祭儀一卷孟子講義十四卷玉溪先生三十八卷宋王應麟玉海有書傳十三卷陳振孫書錄解題有芸閣禮記解十六卷云此晦庵朱氏所傳本刻之臨漳射堞者又晁說之郡齋讀書志有編禮三卷云以士喪禮爲本三禮附之其施惠於後學甚悉又朱子語錄曰今世傳明道中庸義是與叔初本後爲博士演爲講義又曰呂中庸文滂沛意浹洽又曰李先生說陳幾叟輩均以楊氏中庸不如呂氏飽滿充實又曰龜山門人自言龜山中庸枯淡不如與叔浹洽與叔却是行得他人與呂如登高望遠各

等語據此有以見呂大臨制行純篤不越五常著書切要不出大經是以內而賢昆弟若大防大忠大鈞外而賢師友若張子程子以至百餘年後大賢若朱子所爲論列而引重之者皆無間言允如迭次聖諭醇粹無疵久經論定而引重之闡明聖學之旨也等公同商榷擬如該學政等所請准以朱儒呂大臨從祀文廟其位在東廡謝良佐之次上諭內閣禮部等衙門議擬陝西學政黎榮翰奏請將朱儒呂大臨從祀文廟一摺宋儒呂大臨純修正學與游酢楊時諸賢同列程子之門所著易經章句大易圖象易傳指歸禮記傳注論語中庸解孟子講義等書皆足發明聖學羽翼經傳其生平尤邃於禮爲朱子所引重洵屬制行誠篤無愧純儒呂大臨著從祀文廟位在東廡謝良佐之次以崇實學而光茂典○楊鼎璠奏察吏之法懸於所聞不若懸於所見方今內而部院寶缺及候補司員外而道府以下候補各員實繁有徒必長吏一一識認其人詢考吏治而後其人之邪正勤惰可得而知現在京中惟翰林院都察院定有接見日期此外各衙門除掌印總辦司員上堂面請查稿外其餘司員雖常川到署求見堂官一面而不可得其久不到署者堂官亦無從而知面貌皆未覩姓名或且茫然其人之邪正勤惰必更無由辨別至於外省雖有衙期或二八日或五十日不等而事屬具文道府州縣等官各起官廳守候接見或竟傳免或止見一二員其餘悉令散去若佐雜微員謁見大吏更無坐地於大吏出署或入署時彙齊呈遞

手版排班站立大吏經過且行且視不交一語人數衆多莫辨誰何其不能分別優劣與部院堂官之於司員情形相似此吏治所以日就廢弛也臣愚以爲京外堂屬以分言之則貴賤懸殊以考察人品才具言之猶師長之於生徒也師必與生相親乃能知其學問堂必與屬相接乃可別其賢愚安有絕不識面向未接談而能悉其底蘊者乎至微員末秩亦復名列摺紳與書吏差役有異進謁時與以坐具假以辭色亦不至戾大吏之尊如果京外大員不憚煩勞勤於接見屬官多方詢問則人品才具自必了然於心遇有要公不難因材器使天下上智下愚少而中材多一經長官之考察未有不爭自淬厲者不特分別優劣並可造就人才現除翰林院都察院向有接見定章無須更張外其餘各部院及外省督撫藩臬各大員應請 旨飭令每月酌定日期認真接見屬官不得視爲具文庶幾以察言觀色之方爲激厲裁成之道於吏治人才實屬兩有裨益 上諭御史楊福臻奏查核屬員宜勤接見一摺各部院司員及各省候補人員流品不一必須詳加考查始能悉其底蘊各部院堂官務當常川入署將各司員隨時留心查看各直省督撫等於所屬各員必應勤加接見訓以地方公事藉可分其優劣如有不諳部務及未能講求吏治者卽行嚴加甄別毋稍姑容○壬子調德壽爲江西巡撫以陳寶箴爲湖南巡撫○張煦奏督省電綫爲順直入陝傳遞電報要路前因光緒十八年天氣亢旱無知愚民藉端聚衆將霍州趙城臨汾洪

洞等處電桿拔毀當經前護撫胡聘之飭令地方採買電桿趕籌修復由北洋大臣轉飭津海關道派員攜帶綫料器具來晉補修除電桿由晉就近採購不計外共用電綫鉤挽及轉運夫馬火食薪工等項銀五千七百八十兩五錢三釐查光緒十三年貴州畢節縣修復電綫支用各款經原任貴州撫臣潘蔚奏奉 恩旨准其作正開銷符省電綫事同一律自應援案請將前項用款銀兩在於山西地丁項下動用准其作正開銷據津海關道咸宜懷造具用款清冊咨由山西藩臬兩司會詳請奏前來臣覆查無異合無仰懇 天恩勅部立案准將山西省修復電綫動用工料銀兩援照貴州成案在於地丁項下作正開銷下部知之○癸丑 上諭 奏先嚴 壽皇殿行禮○諭軍機大臣等有人奏大員違例聯姻任用私人政刑失當請旨查辦一摺據稱雲南藩司岑毓英前在臬司任內其兄弟昆明縣廩生王德寶出入衙署遇事招搖羅平州紳士孫濟臣與該司誼屬至戚狼狽為奸又與候補知府蔣寶英締姻並不呈請迴避廣東候補道李光翰等該司倚為爪牙同惡共濟上年護理巡撫兼護總督為日無多所參州縣多有廉能素著之員所換文武職百餘員奏報者不過數十員更換各局差有未屆期而預給札委者人言嘖嘖顯有賄賣情弊甚至押釋重案逆犯高振業又將司監府縣各犯釋放百數十人參將馬桂殺良冒功反將其升補督標中軍副將等語雲南為邊徼要區鎮撫綏綏均關緊要若如所奏該司恣逞私心極

相謬妄實於吏治邊防大有關係著將按照原參各節確切查明據實具奏原摺鈔給閱看將此由四百里諭令知之○甲寅以張春發爲廣東陸路提督○諭楊昌濬奏總兵援剿不力請旨懲處一摺甘肅逆回滋事日益蔓延自海城收復循化解圍後河關西寧又復聚眾猖獗總兵湯彥和奉調赴援遷延日久迫行抵河州又不偵探虛實冒昧進攻以致全軍潰敗貽誤戎機湯彥和著卽革職留營帶罪圖功以觀後效楊昌濬在甘有年於國家情形豈未深悉忽則急撫毫無定見以致渭忠河狄偏地皆賊竄踞措置乖方雷正綰受回愚弄發給軍械轉藉寇兵亦屬庸懦不職楊昌濬雷正綰均著交部議處此後務當振刷精神破除積弊俟黃福祥等軍到後合力同心將回氛迅速掃除庶可稍贖前愆懷之○乙卯

上詣 奏先嚴 壽皇殿行禮○戊午吳大澂奏湖南省城設求賢館改爲求賢書院報聞○吳大澂奏湖南沅州設立校經堂以經史實學課士下部知之○許景澄奏本年四月間俄國戶部大臣威特述其國主之意深願中國速給償款俾日本早日退兵並令伊部代籌款項以備周轉必於中國有益等語旋擬推薦俄法銀行承辦經臣迭奉 旨暨總理各國事務衙門來電與外部大臣羅拔諾夫會同威特詳慎商辦先與商明不干預海關之事不派員赴中國另議復於合同改去俄國加保字樣並刪改俄外部所擬專條聲敘均不牽連遼事業經外戶二部照允閏五月初三日奉 旨飭 將俄款各端斟酌



訂定初五初六日與外戶部會擬專條定稿并合同各條摘要電達總理衙門核定初九日奉 旨合同各條著許景澄斟酌妥協即與書押訂定欽此俄外部隨電俄使喀希呢與總理衙門王大臣晤商一切十三日外部據喀希呢電覆相同即訂 於十四日將兩國議訂專條並銀號合同核對洋文無誤分析書押訖查合同內載中國訂借法銀四萬萬佛郎按九四又八之一扣再扣印稅造票工本發寄等費周年四釐起息由中國駐使出給借款總據銀號商董先將總款全數刊印股票散售每年分還票本息共二千一百十五萬四千七百五十二佛郎另加銀號經辦費用四分釐之一並刊報添印憑票等費半年一給至三十六年清訖十五年後亦可將票本增還或全還其息以西歷本年七月初一日起算交款極遲自西歷八月二十日至明年正月初一日止分期交清未交款之前應給憑銀由銀號扣存抵付此項借款以海關作保遇有付款阻滯俄國允許立合同之銀號按期接付票本息中國在六箇月不另借款每年銀號經辦製發銷票刊報對號等事由使館派員稽察借款全還銀號即將總據繳銷以上各節計列十九條此 與俄法銀號商董互訂合同之情形也俄外部以專條名目較重商定改聲明文件內載第一端中國公使知照海關作保前借之款及每年應還前項本息各若干海關每年稅入全數若干俄國以此爲據第二端中國允將海關稅款除還前借本息外即預備此次借款本息其以後借款不能於

每年分還之前撥款先付第三端此款付還時遇有阻滯俄國於中國商明允許銀號備給分年股票本息中國另許俄國別項加保由兩國大臣在京商辦第四端因借款之事中國決不允他國辦理照看稅入等項權利如允他國此項權利亦准俄國均第五端此聲明文件自借款合同畫押日爲始至還清此款日爲止以上各端彼此言明專用法文繕寫各不配本國字以從常例此與俄外部戶部訂辦聲明文件之情形也竊查泰西銀號攬辦各國國債無不以散售股票爲聚集鉅款之計民間購票必擇厚息惟英法德俄數大國之票議息雖輕乃能速售中國距泰西較遠從前借款年息最少均在大盤內外今欲減至四釐銀號慮票不易銷卽不敢驟允承訂故俄戶部請由經辦之國助任其事俾銀號得招徠之資而中國收撙節之益惟利弊倚伏所貴兼籌現合同及聲明文件再三改定自可釋外議而防後患果至十五年後提早清還則中俄訂件亦一併作廢其間期限尙可由我操縱至此大海關作保並不由稅司出票應請 旨飭下戶部暨總理衙門轉行總稅務司存案並於每年應給本息先期撥備以資匯付冀於商項邦交均臻妥密得 旨該衙門知道○己未命延茂往黑龍江查辦事件○諭軍機大臣等都察院奏湖北麻城縣生員袁潔三等這抱以該縣徵收錢糧知縣張集慶等任聽里書種種舞弊等詞赴訪衙門呈訴案關里書包攬涉收賄官徇私縱容亟應澈底根究著譚繼洵確切查明如果屬實卽行

從嚴禁革以蘇民困原摺著鈔給閱看將此諭令知之○辛酉 上詣 慈福端佑康頤昭豫莊誠壽恭  
欽獻崇熙皇太后前請安○諭前據御史高燮曾奏參江西巡撫德馨貪婪荒縱當經諭令張之洞按款  
確查茲據查明覆奏德馨被參委缺委差皆須賄賂一節查無實據惟所賞拔任用多係貪滑奸詐之人  
平日收受屬員餽送縱容門丁近侍婪索且於籌辦防務之際兼旬演戲一味酣嬉實屬辜恩濫職江西  
巡撫德馨著卽革職餘千縣知縣何其坦德安縣知縣朱士林韶州鎮營招搖漁利萬載縣知縣周鳳藻  
貪婪鄙劣荼毒地方候補知府前上饒縣知縣朱錫祁以暴濟貪任意殃民均著卽行革職候補知縣王  
書臣卑鄙迎合不知立品安徽候補道朱文藻前在江西撫署物議甚多該二員僅令降補不足蔽辜均  
著一併革職門丁吳子昌高寶樹著分別查取姓名籍貫及報捐官職嚴拿懲辦○諭前據都察院奏已  
革參將吳世恩以被參冤抑等詞赴該衙門呈訴當經諭令譚鍾麟飭屬確查茲據查明奏稱已革參將  
吳世恩定典之田被主先期贖賣以致涉訟傳訊未到係長科罰所致情尚可原總兵林宜華雖無賄串  
實據惟出入衙門特縱恣應將林宜華革職吳世恩請開復原官等語林宜華著卽行革職以示懲儆  
至所請吳世恩開復原官之處著兵部核議具奏○壬戌以胡聘之爲陝西巡撫○癸亥 上詣 壽皇  
殿行禮○諭吏部兵部會奏遵議處分一摺陝甘總督楊昌濬陝西固原提督雷正綰應得革職處分均

新加恩改為革職留任該督等當知感奮迅將回逆掃蕩力順前愆○甲子調王廉為直隸布政使以干  
陸霖署安徽布政使○以龍錫慶為浙江布政使惲祖翼為湖北按察使○丙寅子山東濟南府故大學  
士闕敬銘祠列入濟南府祀典○諭在京文武大員分理庶務各有專司近來告假人員幾於無日無之  
殊非慎重公事之道嗣後非實係患病者概不准率行請假以重職守○諭前據已革御史鍾德祥奏參  
直隸蘆縣知縣馬慶麒抑勒苛派等款當經諭令王文韶確查具奏茲據查明復奏馬慶麒在蘆縣任內  
查無貪汙苛酷劣跡惟辦事因循辦公敷衍實屬不勝知縣之任著開缺以府經歷降補○丁卯 上幸  
頤和園詣 慈禧端佑康頤昭豫莊誠壽恭欽獻崇熙皇太后前請安○還宮○諭據都察院奏已革湖  
南候補知縣張銘呈稱前控被批冤控之案回鄂年餘終未提訊復行來京呈訴等語此案前諭令張之  
洞查辦旋經調署兩江奏明移交譚繼洵審辦現已年餘何以尚未訊結著譚繼洵迅速提集人證研訊  
確情據實覆奏該革員張銘仍著該衙門飭令前赴湖北聽候傳訊○陶模奏援案預佔新疆等處新餉  
共計實需銀二百四十二萬兩懇請 飭部照數指撥山甘肅藩司統收分發以濟要需下戶部議奏○  
戊辰楊福臻奏監禁以待罪人而無罪之拘留苦吏加於監禁刑具自有定式而無刑之凌虐酷憫甚於  
施刑近年待質公所尤屬慘難言狀 上恭讀道光十六年七月 上諭近來外省州縣竟有設立班館嚴

押人證甚至經年累月隨意拖延以致胥役勒索民冤莫伸不可不嚴行查禁以靖閭閻著直省督撫督飭各州縣毋得設立班館審理詞訟務須遵照定限卽行審結等因欽此 聖訓煌煌問刑各官固當永遠遵守乃近年各州縣多設待質公所一切干連人證及輕罪人犯悉拘押此中間官不卽審結徧月經年饑寒交迫疫癘頻生家人不許通問差役橫加需索稍不遂意卽加凌虐或將辮髮繫於穢桶引其兩手懷抱使穢氣衝入口鼻或置於木盆而繫之樑上另以繩索使搏斃令其眩暈嘔吐或繫兩手大指於高處令其兩足離地經數時之久手指長至數寸或以煙薰鼻使之刻難忍受其他凌虐尙多皆屬不可思議被押者多至瘕斃聞之惻然 聖念如此虐政創自何年溯查乃知係原任貴州巡撫黎培敬據前兩淮總大使湯用中原議具奏於光緒二年閏五月經刑部議准刊入通行章程名曰添設待質公所通行各省 核其原議係爲臬司提案押斃人命因設此所以期杜弊意因甚善無如所議仍不離乎拘押則弊且益滋 聖請一一剖析陳之原議謂人證親押公廨無以營生官捐數十文典守者恣情剋扣宜從藩庫撥款每名准支口糧不知差役貪酷萬古不移出自官捐者剋扣撥從藩庫者卽無剋扣乎原議謂派委丞倅專司其事稱押新收造冊詳報其所以處此稱押新收者何若不得而知也原議謂疾病死亡造冊詳報其所以致此疾病死亡者何故又不得而知也原議謂以瘕斃之多稟定委員之功過夫監斃罪

因尙有慮分瘼斃無辜僅止記過足以示懲儆乎原議謂凡待質之人徑發該所是恐無妥保也而議中又有疾病取保醫調一條豈未病時無妥保致病時卽有妥保乎既有妥保矣則何不取保於未病之先必待其羈押既久釀成疾病而後取保仁耶不仁耶總之一經拘押則授械差役雖設嚴法萬難杜其弊端譬之付羊豕於虎狼而戒其勿噬其可得乎無論聽斷不公致多冤抑卽使訟而得直而彼此拘押固已湯產傾家且查當日官議祇爲臬司提案而設不知何年各州縣提審本地案件亦多仿此辦理致使普天率土之民遭此慘酷豈非所以儆我皇上好生之德也查例載大小問刑衙門設有監獄除監禁重犯外其餘千連並一應輕罪人犯卽令地保保候審理如有不肖官員擅設倉舖所店等名私禁輕罪人犯及至淹斃者該督撫卽行指參照律擬斷等語例文防患甚周故除監禁重犯外其餘皆令保候審理若設所拘押是監之外又添一監顯與例禁倉舖所店之義相背不知當日刑部既欲杜因押斃命之害但遵保候審理定例則諸弊不杜自除何以於例所嚴禁之端公然添設轉使各州縣從前私押猶有顧忌今則視爲宜然明目張膽莫敢究詰若不立卽裁除恐衝寬之民無所託命伏懇 勅下刑部將通行章程內添設待質公所一條刪削仍遵保候審理定例並乞 諭令各省督撫卽行迅飭臬司及各州縣凡有待質公所立卽裁除永遠不許復設其應提審案件隨卽審結其有必須候質者遵例取保候審

不得拘押違者嚴參庶差役無從凌虐億萬赤子咸荷 仁恩得慶更生矣 上諭楊福孫奏各省待質  
公所請飭裁撤一摺著刑部議奏○是月京師有疫